

Acts

Vavahinau Non Tanume Tapu

Puku Nike

Harihi enia tapala puku peresi na Retiřuhu sei Luke mo ulia. Hinira Luke mo uli mamahuni na hinau tari Iesu mo lo vaira mo tikeli rani atu mo sahe na tuka (1.1-2). Na tapulo puku nike mariviti Iesu i pa sahe na tuka, ale mo retileu isana nona tamlohi mara la pa lo sasaovi Jerusalem mata Tanume Tapu (1.8).

Iesu mo sahe na tuka, ale vao kalesia la unu hin mauri atu God mo supe hinia na jara tari na varama hin pongi atu (2.1-35). Jew la lo řomřomia lara enira hasera purongo la tamlohi non God, pani puku akerihi mo vujangia vara Tanumen God mo mai mata tamlohi řořoha sohera.

Iesu mo pala isan Paul mata vironia vara i mai nona volitusi (9.1-22). Paul mo hahau mata lavi na Retiřuhu i vano isana jara tamlohi řořoha ale tamlohi matuvana la mai la kalesia matana. Jew la opoia vara la pa vilimateia, pani na isoisona Paul mo lavi na Retiřuhu mo kakau Rome (28.16-31).

Hin Puku Akerihi

1. Retiřuhu Mo Ulua Jerusalem (1.1–8.3)
2. Tanumen Tapu Mo Jovi Hinira Judea Peresi Samaria (8.4–12.25)
3. Tiroma Hahau Non Paul (13.1–14.28)
4. Council Tavera Nona Kalesia Jerusalem (15.1-35)
5. Harua Hahau Non Paul (15.36–18.22)
6. Hatolu Hahau Non Paul (18.23–21.16)
7. La Taurilati Paul Jerusalem (21.17–23.22)
8. La Lavi Paul Mo Sivo Caesarea (23.23–26.32)
9. Paul Mo Sahe Rome (27.1–28.31)

Retitauhi Mata Tanume Tapu

1 ¹Theophilus, na noku puku tiroma na uli na hinau tari Iesu mo tapulo vaira, ale mo lo vujangira ²mo kakau hin rani atu God mo lavi nañihia, mo sahe aulu na tuka, sei tiromana mo sile na nona retileu hin Tanume Tapu isana nona vahañule sei mo viñonira.

³Hitahun na nona rongohaji, mo mele hase vujangia isara vara mo mele mauri na malele tinatinapua matuvana hin la rani atu, mo ngavulu vati atu sei mo lo sorahi mauri atu God mo aulu hinia isara. ⁴Tiroma sei mo pa lo toho peresira mo vereea mara, “Ha sopo malue Jerusalem pani ha lo saovi tako mata sava na pete vereea isamim moiso sei vara Tama i pa ñule na Tanume Tapu, i mai isamim. ⁵Matan John tamlohi paptijo mo paptijo na wai, pani i pa sopo tuai ha pa paptijo na Tanume Tapu.”

Iesu Mo Mele Sahe Na Tuka

⁶Hin rani atu vahañule la lo toho peresi Iesu, tarea la lo usia isana lara, “Moli, engko o pa turu na nom suiha mata supe aulu hin Israel pangisa?”

⁷Iesu mo vereea isara mara, “Mo sopo tinañihia vara ha levosahi na ranin hinau sei Tama hasena mo taua usuri na masalona. ⁸Pani kamim ha pa lavi na suiha hin rani atu vara Tanume Tapu i mai hin kamim, ale kamim ha pa noku tuetueni hin Jerusalem, na jara tari Judea, Samaria, i tikeli na isoiso jara tari na varama.”

⁹Hitahun la hinau atu mo lo verera, ale lara la pa lo kilaua, palona mo tinañihi na lepa mo lo sahe aulu, ale telangi matea mo lavi nañihia mo tihai na nahora, ¹⁰ale la pa lo taña la lo tañengia mo lo sahe na tuka, ale vahatea purongo, tamlohi mo rua la ru la ruru lulu jea la lo turu na pahisara, ¹¹ale la vereea lara, “Mara Galilee, mata sava ka lo turu nike, ka lo kilau sahe na tuka? Iesu akerihi sei God mo lavi nañihia isamim, mo sahe na tuka, i pa mele sinai sohen harihi ka lo hitea mo lo sahe na tuka.”

Matthias Mo Lavi Na Jaran Judas

¹²Hin rani atu hinau atu mo masese vahañule la lo toho na Vuti talu Olive mariviti kilometre matea hin Jerusalem, ale la mele hilu la vano Jerusalem. ¹³Ale lara la unu Jerusalem, la vele sahe aulu na jara tinapua matea hin ima atu sei la lo toho ea hin rani atu:

Peter

John

James

Andrew

Philip

Thomas

Bartholomew

Matthew

James natun Alphaeus

Simon sei, enia tamlohi matea mata valum mata jarana,
peresi Judas natun James.

¹⁴Enira mo isoiso la tau na řomira mata ususi jara matea tolu na hařai tinatinapua hai peresi Mary tinan Iesu tolu na tasin Iesu.

La Viřoni Matthias

¹⁵Hin rani atu, Peter mo lo turu na livuhan la tamlohi rasua atu, ale vao atu mariviti i ngav sangavulu ngavulu rua (120) la lo pulutahi hin jara atu, ale mo vereea isara mara, ¹⁶“La vorai, sava Retitapu mo vereea vara i pa masese isan Judas, Tanume Tapu mo vereea tiroma moiso na jingon supe David mara, enia i pa tiroma hin la haratu la pa taurilati Iesu. ¹⁷Matan enia mo viřonia peresiřa, ale enia vonařa matea na nořa vavahinau.

¹⁸Ale tamlohi akerihi mo voli na lepa matea na voli nona hehe. Mo vele mo sahe na pesapesa, ale mo jovi patuna mo tiroma mo vujahi řařihi na pangena, ale tinena tari la mařava. ¹⁹Mara Jerusalem tari la rongoa, ale la tau na hijan jara atu vara Akeldama: na leora mo vara, ‘Lepa Mata Rae’.

²⁰Matan David mo ulia na nona puku na psalm mara, ‘Ha tinařihia vara jara nona toho i puru, ale i sopo tea i toho hinia’. *Psa 69.25* Ale mo mele vereea mara, ‘Ha viřoni te tamlohi tinapua i lavi na jarana’. *Psa 109.8*

²¹Ale nakerihi, řa pa mele viřoni te tamlohi tinapua hatea vara i lavi na jaran Judas, enia i pa tamlohi matea mo lo toho peresiřa tarea hin rani atu Moli Iesu mo lo toho peresiřa, ²²mo tapulo hin rani atu sei John tamlohi paptijo mo tapulo paptijo mo mai mo tikeli rani atu Iesu mo mele sahe na tuka — enia i pa vonařa matea sei mo hite na nona sauteterahi.”

²³La vere na tupra rua, matea enia Joseph la tovia Barsabbas teni Justus, ale haruana enia Matthias. ²⁴Ale la ususi lara, “Moli, engko ko levosahi na mapu tamlohi tari. O vujangi kamam hin haratu sei ko viřonia ²⁵vara enia i pa lavi na jaran Judas peresi na nona vavahinau, matan enia mo vano na nona talai.” ²⁶Ale la reve na hijara, ale mo jovi isan Matthias, ale Matthias mo mai vahařule matea peresi la haratu mo sangavulu řomana matea.

Tanume Tapu Mo Mai

2 ¹Ranin Pentecost mo pala, la lo toho na jara matea enira mo isoiso. ²Ale vahatea purongo, la rongoa na hinou matea sohena langi tavera matea mo lo sere, ale mo mařivisi ima atu la lo sakele hinia. ³Ale hinou hai sohena pepe hapu, la pala isara la sakele aulu na patura hatehateahi.

⁴Ale enira mo isoiso, Tanume Tapu mo sohonira, ale la tapulo retireti na leo tinatinapua sohen Tanumen God mo tinañihira hinia.

⁵Hin rani atu, Jew matuvana na jara tari na varama sei řomira mo řilangi mata nora rasua la lo toho atu Jerusalem. ⁶Ale vaore tavera atu, mo vai na vao tamlohi la mai jara matea, ale la hutura matan enira hatehateahi la rongora la lo retireti na leora.

⁷Ale la hutura, la mañurahi tavera lara, “Avei, la tamlohi nike, la sopo mara Galilee nakonako? ⁸Ale mata sava natu řa lo rongora la lo retireti na leo jaraña hatehateahi sei řa vora hinira? ⁹Enña mara Pathian, Medes, Elamite ale mara Mesopotamia, Judea, Cappadocia, Pontus, Asia, ¹⁰Phrygia, Pamphylia, Egypt ale jara hai Libya na lolon Cyrene, ale hai la tai Rome. ¹¹Tatuara Jew, tatuara enira la tamlohi řořoha sei la lo usuri Moses, ale mara Crete peresi na mara Arabia — řa rongora la lo retireti na leoña. La lo vere na vavahinau řuhu mata suiha non God.” ¹²Ale enira mo isoiso, la mañurahi la hutura, la lo verevera hinia lara, “Matamata mata sava nahai?” ¹³Pani tatuara la kerehira lara, “Hara sei, la drong na waen meji!”

Peter Mo Retivujavujangi

¹⁴Ale Peter peresi la tupu sangavulu řomana matea atu, la turu mai na nahora, ale mo ulo mo vereea isara mara, “Mara Judea, ale mara Jerusalem tari, ha tapurongo! Ha levosahi mamahuni hinia nike! ¹⁵Matan la tamlohi nike la sopo drong sohen ka lo řomřomia, matan mo pa lo řalavuhu purongo nahai. ¹⁶Pani hinia nike přovet Joel mo vereea moiso mara,

¹⁷‘God mo vereea mara:

Na pongi hitahu, a pa surei na Tanumeku na tamlohi tari,
ale natumim peresi na venatumim la pa retimangovi,
ale uluvoumim lamane la pa hite na hinia sohena mavuho a pa
vujangia isara,

ale vajiahamim a pa silera na mavuho;

¹⁸hin pongi atu sohena,
a pa surei na Tanumeku isana noku slev lamane peresi na slev hañai,
ale la pa retimangovi.

¹⁹Ale a pa vujangi na matamata mañurahi tavera aulu na masapa,
ale matamata mata řae,

hapu peresi na asu hapu atano na varama,

²⁰ale alo i pa posi i mai i řořoha,
majhi vitu i pa hahara sohena řae,

la pa pala tiroma hin rani atu Moli i pa mele mai,
rani tavera atu i pa řuhuřuhu jea.

²¹Ale rani matea i pa mai vara sava tamlohi la tau na nora rasu na hijan
Moli la pa juri.’ ”

Joel 2.28-32

²² Ale Peter mo mele verea mara, “Tavtavu in Israel, ha tapurongo! Iesu mara Nazareth, tamlohi matea God mo taua na nahomim, mo lo vai na vavahinau mata suiha, matamata řuhuřuhu tavera, peresi na matamata mařurahi sei God mo vaira na nahomim hin Iesu, sohen kamim mo isoiso ka levosahi mamahunia — ²³ tamlohi atu, ka taua na lima tamlohi sasati, matan vara la pa vosaea na talopeilopei vara i mate, pani haratu mo pa lo usuri na řomřomi tavera non God, ale enia mo levosahia tiroma moiso vara i pa sohenia. ²⁴ Pani God mo sauteterahia, mo teria na liman mateia, matan mateia i pa sopo eři tauria na suihana. ²⁵ Matan supe David mo retireti matana mara,

‘Tarea na lo hite Moli na nahoku,
matan enia mo lo toho na matuaku,
enau a pa sopo hisu.

²⁶ Matan haratu mapuku mo avulahi,
ale leoku mo uloulo na hasohasona!
Epeku i pa toho na liman řomtoho,

²⁷ matan engko God o pa sopo tinařihia vara a toho na varama mata mateia,
teni vara o tinařihia vara nom tamlohi tapu i řovo na taptap.

²⁸ Engko ko vujangiau moiso na malele mata mauri;
engko o pa vaiau a avulahi tavera na nahom.’ *Psa 16.8-11*

²⁹ La vorai, na levosahi mamahunia vara a eři verea isamim, vara pua David mo mate ale la tavunia. Ale tapuna mo lo toho peresiřa mo kakau nake. ³⁰ Matan David enia přovet matea, mo levosahia vara God mo vai na retitauhi matea peresia, vara mahapina matea, i pa sakele na nona jara sakele mata supe, ³¹ David mo hiteulia tiroma moiso, ale mo verea mara Křisto i pa sauteterahi, ale vara i pa sopo taua vara i lo toho na varama mata mateia teni vara epena i řovo.

³² Iesu sei, God mo sauteterahia na mateia, ale kamam mo isoiso kama hitea. ³³ Nake, God mo tahea mo sahe na matuana, vara i tauri na suiha tavera sei mo aulu jea mo jeu na tinapua na tuka, ale usuri na retitauhi non God Tama, mo lavi na Tanume Tapu, ale mo sureia hin kamam, sei ka lo rongoa ale ka lo hitea nakerihi. ³⁴ Matan David mo sopo lo sahe aulu na tuka, pani enia mo verea mara,

‘Moli, mo verea isan noku Moli:
O sakele na matuaku,

³⁵ i tikeli rani atu a vai na nom meresahi, la toho na ruhuruhu palom.’ *Psa 110.1^a*

³⁶ Matan haratu, mo řuhu vara tamlohi tari Israel la levosahi mamahunia vara God mo vaia mo mai Moli! Ale mo vaia mo mai Křisto, pa Iesu atu sei ka lo vosaea na talopeilopei!”

a 2.35 *ruhuruhu palom*: Iesu mo lavi na suiha tavera mo aulu jea hinira.

³⁷Lara la rongo na nona reti, ñomira la jovi vahatea. Ale la vereá isan Peter tolu na vahañule tari atu lara, “La vorai, kama pa vai na sava?”

³⁸Ale Peter mo vereá isara mara, “Ha posi! Ale ha paptijo kamim mo isoiso na hijan Iesu Křisto, matan vara God i ñomi na nomim hehe! Ale i pa sile purongoi kamim na Tanume Tapu. ³⁹Matan retitauhi nike, enia nomim peresi na natumim, ale nona tamlohi tari sei la lo toho asau ñove, tamlohi mo isoiso sei Moli noña God i pa tovira vara la mai isana.” ⁴⁰Ale Peter mo mele vujangira vavano, mo vereá řilangi isara mara, “Ha juri kamim hasemim hin pina lejileji nike!”

⁴¹Ale evin la haratu sei la rasu na nona reti moiso la paptijo hin rani atu, la mai kalesia korong mariviti tari vaha tolu (3,000). ⁴²Ale la hase taura na vujangi nona vahañule, ale la matavuhi mata hanhani tapu peresi na usiusi.

Kalesia La Tapulo Matavuhi Jara Matea

⁴³Ale matahu tavera mo sohoni na tamlohi tari matan vahañule la vai na hina mañurahi tavera matuvana peresi na matamata tavera. ⁴⁴Ale tarea, tamlohi rasua tari la lo pulutahi jara matea, ale hinau tari enia nora enira mo isoiso. ⁴⁵Ale la lo añehi na jarara peresi na nora hinahinau, ale la lo asera isan la haratu la vejuveju hin te hinau. ⁴⁶Ale na rani hatehateahi, la lo matavuhi na Temple, ale la lo lavi na hanhani tapu na lolo imara, ale na nora hanhani la vaia na avulahi peresi na hansohai. ⁴⁷La hasohaso God, ale tamlohi tari la avulahi hinira. Ale na rani hatehateahi tamlohi tinatinapu sei Moli mo jurira, la lo pulutahi peresira.

Tamlohi Hariju Matea

3 ¹Peter enia John la lo sahe na Temple na rani mata usiusi na matan alo mo tolu na ravravi. ²Ale tamlohi hai, la lavi na tamlohi matea mo vora mo hariju moiso. La lavia matan vara la pa mele taua i juruvi sohen tarea na pahisa matarua matea na ropen Temple atu sei la tovia ‘Matarua Řuhuñuhu’ vara i mele usi na mania isan la haratu la lo unu na Temple ea. ³Mara mo hite Peter peresi John la lo unu na Temple, mo usi na mania isara.

⁴Ale Peter mo kilau tataholo sivo isana, ale John sohena mo vaia ale Peter mara, “O kilau kamam.” ⁵Ale tamlohi hariju atu mo tañengira matan mo lo ñomñomia mara la pa sile te hinau isana. ⁶Pani Peter mo vereá mara, “Mo sopo te noku silver teni gold, pani sava enia noku, a pa silea isam na hijan Iesu Křisto mara Nazareth. O turu o hahau!”

⁷Ale Peter mo sohái na matua limana mo tauria mo sauá, ale vahatea purongo, varango palona peresi na jue palona la řilangi. ⁸Ale mo kue mo sahe aulu mo turu, ale mo tapulo hahau řalihi na palona, ale mo usurira la unu na lolo rope Temple. Mo lo hahau, mo lo kuekue ale mo lo hasohaso God.

⁹Ale tamlohi mo isoiso la hitea mo lo hahau mo lo hasohaso God, ¹⁰ale la hitevosahia vara enia natu pa tamlohi atu sei mo lo sakele na ‘Matarua Ťuhuru’ mata Temple tarea mo lo usi na mania. Ale la maŕurahi tavera na sava mo masese isana. ¹¹Mara mo pa lo keho hin Peter enia John, tamlohi tari la maro la mai isara hin jara atu sei la tovia Palapalan Solomon, ale la hutura tavera hinia.

Peter Mo Retivujavujangi Na Temple

¹²Ale Peter mara mo hitera la lo mai mo verea isara mara, “Tavtavuin Israel, mata sava ka hutu kamim hin hinou nika, teni mata sava ka lo varoi kamam sohena, vara kama vai tamlohi akerihi mo mele hahau na nomam suiha teni matan nomam posposi tataholo? ¹³God non Abraham, God non Isaac, God non Jacob, God non noŕa pua, mo tahe nona volitusi sei Iesu, hara sei ka taua na liman noŕa tamlohi aulu, ale ka ŕohu hinia na nahon Pilate hin rani atu mo opoia vara i teria. ¹⁴Pani kamim, ka tipahi haratu sei mo tapu mo tataholo jea, ale ka usi Pilate vara i sile kamim na tamlohi vilimatei na tamlohi matea. ¹⁵Ale ka vilimatei haratu enia pulo mauri, hara sei God mo sauteterahia na mateia. Hinou sei kamam kama hitea na matamam.

¹⁶Ale tamlohi akerihi ka hitea ale ka levosahia, kama lo verea vara nona rasua na hijan Iesu natu mo vaia mo ŕilangi. Rasua atu hin Iesu mo vai mamahuni na epena na nahomim mo isoiso.

¹⁷Ale la vorai, na levosahia vara ka sopo levosahi na sava ka vaira, sohen nomim tamlohi aulu la vaira. ¹⁸Pani sava God mo verea tiroma moiso na jingo pŕovet tari, sei vara nona Kŕisto i pa lavi na rongohaji sohena sava ale mo maŕivisia. ¹⁹Matan haratu, ha posi, ale ha posi mai isan God matan vara i jarai naŕihi na nomim hehe, ²⁰matan vara rani ŕuhuru mata suiha paro la mai isamim la tai na nahon Moli, ale i pa mele ŕule Iesu vara i mele mai isamim sei God mo viŕonia vara i nomim Kŕisto, ²¹enia i pa toho na tuka i tikeli rani atu God i mele vai tataholo na hinou tari sohen mo verea na reti nona pŕovet tuai moiso. ²²Moses mara, ‘Moli God i pa tahe na nomim pŕovet matea na voraimim soheku. Ha pa tapurongo na hinou tari i pa verea isamim.’ *Deut 18.15* ²³Ale mo mele verea mara, ‘Tamlohi tari sei la ŕohu vara la ololo hin pŕovet atu God i pa langahi naŕihira na nona tamlohi ale i pa vilimateira.’ *Deut 18.18-19*

²⁴Ale pŕovet tari sei la sile na nora retireti, mo tapulo isan Samuel peresi la haratu la pa mai hitahuna, enira sohena la pete retivujavujangi hin la rani nika moiso. ²⁵Kamim, ka natun la pŕovet atu tuai, ale ka natun retitauhi atu God mo vaia peresi na nomim pua, sei mo verea isan Abraham mara, ‘Ale na mahapim, vao tamlohi tari na varama la pa avulahi tavera hinia.’ *Gen 22.18; 26.4*

²⁶Hin rani atu God mo sauteterahi nona volitusi mo ŕulea mo mai isamim tiroma tavtavuin Israel, matan vara i leŕuhu hin kamim i vai kamim ha posi na nomim posposi hehe.”

Peter Enia John Na Naho Council Jerusalem

4 ¹Ale Peter enia John la pa lo retireti isana tamlohi, p̄ris peresi na patu tamlohi nona police mata Temple peresi na Sadducee hai la mai isara. ²La lolokoru tavera hinira matan la lo vujangi na tamlohi, ale matan la lo retivujavujangia vara God mo sauteterahi Iesu na mateia. ³Ale la taurilatira, la taura na ima řilangi mo tikeli na rani tinapua matan mo pete ravravi moiso. ⁴Pani tamlohi matuvana hin la haratu la lo tapurongo isara, la rasua. Ale evin la tamlohi atu mariviti i tari vaha lima (5,000). ⁵Ale mo mele rani sahe, nora tamlohi aulu peresi na vajiahara peresi na tamlohi vujangi mata leu, la matavuhi jara matea Jerusalem, ⁶peresi Annas sei p̄ris aulu, ale Caiaphas, John, Alexander ale tamlohi tari sei la tai na vaon p̄ris aulu. ⁷Ale la vaira la turu na livuhara, ale la tapulo usira lara, “Ka vai hinau atu na sava suiha teni na hijan hare?”

⁸Ale Tanume Tapu mo sohoni Peter mo vere a isara mara, “Tamlohi aulu peresi na vajiaha; ⁹vara ka lo usi kamam vara kama vai na hina řuhu isan tamlohi hariju nike sohena sava, ¹⁰ale a pa vere a i mera i řuhu isamim tari, ale isana tamlohi tari Israel, vara tamlohi nike mo řuhu na hija peresi na suihan Iesu Křisto mara Nazareth sei ka lo vosaea na talopeilopei, pani God mo sauteterahia na mateia.

¹¹Iesu akerihi natu enia,

‘Vatu atu kamim tamlohi voro ima ka tipahia, enia mo mai pulo vatu mata ima.’ *Psa 118.22*

¹²Ale mo sopo mele te malele tinapua vara tea i eři juri hinia matan mo sopo mele te hija tinapua na varama vara God mo silea vara tamlohi la pa juri hinia.”

¹³Ale lara la hite na turu řilangi non Peter enia John, la mařurahi tavera matan la levosahia vara la tamlohi nike la sopo lavi te lelevosahi isara, ale la vara enira la tamlohi purongo purongo, ale la pa hitevosahia vara enira la lo toho peresi Iesu tiroma. ¹⁴Pani lara la hite tamlohi atu sei mo mele řuhu mo lo turu na pahisara, la sopo eři mele vere te hinau sati vano isara. ¹⁵Ale lara la retileu vara la malue na nora matavuhi, ale la tapulo sorasorahia isara — ¹⁶lara, “Řa pa vai na sava isan la tamlohi nike? Matan la vai na matamata tavera matea na naho tamlohi tari Jerusalem, ale řa sopo eři vunvunia. ¹⁷Pani matan vara řa opoia vara řa horora vara la sopo mele retivujavujangia isana tamlohi, řa pa retiřoařoahaira vara la sopo mele vujangi hin Iesu isan tea.” ¹⁸Ale la tovara la mele mai la turu na nahora, ale la silera na reti řilangi matea vara la sopo mele retireti teni la vujangi na hijan Iesu.

¹⁹Pani Peter peresi John la řaramira lara, “Vara ka hitea mo tataholo vara kama ooloo hin kamim, pani mo sopo hin God, ha to kilausuria;

²⁰matan kama sopo eñi isoiso na nomam retireti na sava hina řuhu kama hitea, ale na sava kama rongoa moiso.”

²¹Matavuhi atu la mele sile na reti řilangi tinapua hai isara, pani la tinařihira la malue matan la sopo levosahia vara la pa sile na talai isara sohena sava matan vara la vaia vao tamlohi atu la pa lolokoru matan la lo hasohaso God matan matamata tavera atu. ²²Matan matamata tavera atu mo masese hin tamlohi atu mo hariju mata tauni mo jeu mo ngavulu vati moiso.

Kalesia La Usiusi Isan Moli God

²³Peter enia John lara la malue isara, la mele vano na vaora mata tamlohi rasua, ale la verera na hinau tari sei la pñis aulu atu peresi na vajiahara la vere a isara. ²⁴Lara la rongo la hinau atu, enira mo isoiso la tahe na leora, la usiusi isan God na řomřomi matea purongo ale lara, “Moli aulu na hinau tari, engko ko vai na tuka peresi na varama, na tasi ale hinau tari sei la lo toho na lolora. ²⁵ko vere tuai na Tanume Tapu na retireti non nom volitusi supe David nomam pua vara,

‘Mata sava tamlohi řořoha la lo lolokoru patura,
ale mata sava tamlohi la lo hatihia vara la pa vai na hinau
rongorongono vono?’

²⁶Matan supe mata varama la turu jara matea,
ale tamlohi aulu la matavuhi jara matea,

matan vara la turuleji hin Moli God peresi na nona Křisto.’ *Psa 2.1-2*

²⁷Matan Herod enia Pontius Pilate, peresi na tamlohi řořoha, peresi na tavitavuin Israel la matavuhi jara matea hin taon tavera nika, la turuleji hin nom volitusi tapu Iesu, haratu ko viřonia mata juri na tamlohi.

²⁸Varařuhu hinau tari la masese usuri na masalom, peresi na nom řomřomi tavera sei ko taua vara i pa sohena tiroma moiso. ²⁹Ale nake Moli, o tapurongo na nora retireti leji, ale o vai na nom volitusi la vere na nom retisohai i sopo te matahu hinira, ³⁰ale o sohai na suiha mata vai na rojoa i tihai, ale vara matamata tavera peresi na hinau mařurahi la pala na hijan nom volitusi tapu Iesu.”

³¹La usiusi mo isoiso, ale jara atu sei la lo matavuhi ea mo hutehi, ale enira mo isoiso Tanume Tapu mo sohonira, ale mo tapulo hin rani atu mo vano, la retivujavujangi na retisohai non God, ale mo sopo te matahu hinira.

Kalesia La Tuetuenira Hasera

³²Vao tamlohi rasua atu řomira mo matea purongo, ale mo sopo tea isara i eñi vere vara nona hinau enia nona hasena, pani nora hinau tari enira nora mo isoiso. ³³Retivujavujangi non la vahařule atu mata sauteterahi non Moli Iesu mo suiha. Ale God mo leřuhu hinira mo isoiso

mo tavera jea ³⁴matan mo sopo tea isara i vejuveju hin te hinau, matan la haratu sei nora lepa teni imara, la aŕehira ale la lavi na volira, ³⁵moiso la taura na lima vahaŕule, moiso la asera isan la haratu la vejuveju hin te hinau.

³⁶Ale vonara matea enia Joseph, tapala hijana vahaŕule la silea isana enia Barnabas, ŕaramin hija sei enia “Tamlohi mata Retituetueni”, enia mara Cyprus matea mo tai na vao Levi na tavgavin Israel. ³⁷Ale mo aŕehi na nona lepa matea, ale mo lavi na volina mo mai mo silea isana vahaŕule.

Ananias Enia Sapphira

5 ¹Tamlohi tinapua matea sohena hijana Ananias peresi narouna Sapphira, la aŕehi na nora hinahinai. ²Ananias mo taurilati na sope volin la nora hinai atu sei la lo aŕehira, ale narouna mo levosahia. Enia mo lavi na sopena mo silea isana vahaŕule, ale mo vereia mara volina enira mo isoiso natu.

³Pani Peter mo vereia mara, “Ananias, mata sava ko tinaŕihi Setan mo sohoni na mapum mo vaiho ko halu Tanume Tapu moiso ko taurilati na sope voli lepa vara nom hasem? ⁴Ko sopo lo aŕehia enia nom teni mo vono? Ale kora ko aŕehia moiso volina mo lo toho na limam vara o pa silea teni mo vono? Mata sava ko ŕomŕomia vara o vai na hinai matea sohen harihi? Ko sopo halu kamam, pani ko lo halu God!”

⁵Ananias mara mo rongo la reti atu, mo jovi sivo na lepa mo mate. Ale matahu mo sohoni enira mo isoiso sei la rongo hinai atu. ⁶Ale uluvou hai la mai, la tatavua ale la alialia la vano la tavunia.

⁷Ale aoa mo tolu mo vano moiso, narouna mo pete pala mo unu pani mo sopo levosahi te hinai na sava mo masese moiso. ⁸Peter mo vereia isana mara, “O to vereia hinia, vara volin lepa atu enira mo isoiso nakerihi natu teni mo vono?”

Sapphira mara, “He'e, volina natu.”

⁹Ale Peter mo vereia isana mara, “Mata sava kamim tupra rua ka hatihia vara ha pa vaihite na Tanumen Moli? O to kilau sahe, la tamlohi atu sei la lo tavuni tuam la lo mele mai, ale nakerihi sohena la pa pete alialiho!”

¹⁰Vahatea purongo, mo jovi na palon Peter mo mate. Ale la uluvou atu lara la unu na lolo ima la hitea, la alialia la vano la tavunia na pahisan tuana. ¹¹Matahu tavera mo sohoni na vao kalesia tari peresi na tamlohi tari sei la lo rongo hinai atu sei mo masese.

Vahaŕule La Vai Na Rojoa La Tihai

¹²Matamata tavera matuvana peresi na hinai maŕurahi la pala na liman la vahaŕule atu na naho tamlohi. Ale enira mo isoiso la lo matavuhi jara

matea na Palapalan Solomon. ¹³Ale la haratu la sopo lo toho na lolo vaora, la matahu tavera vara la pulutahi peresira, pani tamlohi la sile na ololo tavera isara. ¹⁴Ale rani hatehateahi, tamlohi la lo tau na nora rasua hin Moli, vao hañai peresi na vao tamlohi la lo mai. ¹⁵Ale tamlohi la lo tau na nora tamlohi rojoa na pahisa malele, la taura na vata teni na epa matan vara řoñon Peter purongo i eñi tikeli na epen te tatuara ale nora rojoa la tihai, vara i hahau i lo vano. ¹⁶Vao tamlohi la lo tai na vanua varihi řalihi Jerusalem la lo lavi na nora tamlohi rojoa peresi la haratu tanume sasati mo sohonira la mai isara, ale enira mo isoiso nora rojoa la tihai.

La Taurilati Na Vahařule

¹⁷Ale pñis aulu peresi la haratu la lo toho peresia enira Sadducee, ale enira la mařivi na mereimerei, ale mo vaira la lolokoru. ¹⁸La taurilati la vahařule atu, la taura na ima řilangi. ¹⁹Pani hin vutepongi atu, angelo non Moli matea mo sinai mo roi na pelatin ima řilangi atu mo tiromara la malue, ale mo vereea isara mara, ²⁰“Ha vano, ale ha turu na lolo rope Temple, ale ha retivujavujangi na tamlohi na retisohai hin mauri nike!” ²¹Ale lara la rongoa sohena, la vano la unu na rope Temple mo pa lo řari na rani ale la tapulo vujangi.

Ale pñis aulu peresi la haratu la lo toho peresia la pala na Temple, la tovi na council tavera nona tavgavuvin Israel sei la tovia Sanhedrin matan vara la pa sakele. Ale la řule na tamlohi hai la vano na ima řilangi vara la lavi la vahařule atu la mai isara. ²²Pani police mata Temple lara la pala na ima řilangi, la sopo hitera, ale la mele hilu la vano la vereulia isara lara, ²³“Kama hite na ima řilangi mo pa lo loko mo řuhu, ale tamlohi kilau na ima řilangi la lo turu na nora pelati, pani kamara kama roira, kama sopo hite tea na lolora.”

²⁴Tamlohi tavera nona police mata Temple peresi na moli nona pñis lara la rongoa sohena, la hutura tavera hinia matan la sopo levosahia vara i pa isoiso epu. ²⁵Pani tamlohi matea mo mai mo vereulia isara mara, “Eh! La tamlohi atu ka lo taura na ima řilangi enira nahai la lo turu na lolo rope Temple, la lo vujangi na tamlohi!”

²⁶Ale tamlohi tavera nona police mata Temple peresi na nona police, la vano la lavi malumira la mai matan la matahu vara tamlohi la pa parura vara la vai na hinau řilangi isara.

²⁷La lavira la mai la vaira la turu na nahon nora council tavera, ale pñis aulu mo usi na retiusia isara ²⁸mara, “Kama retihoro kamim moiso vara ha sopo mele retivujavujangi na hijan tamlohi atu. Ka hitea, nake Jerusalem mo mařivi na nomim vujangi, ale ka opoia vara ha tau na řaen tamlohi nike isamam!”

²⁹Pani Peter peresi na vahařule la řaramia lara, “Kama pa ololo hin God hasena, mo sopo na tamlohi. ³⁰God non nořa pua tuai mo

sauteterahi Iesu na mateia, mo vaia hitahu hin la rani atu sei ka vilimateia ka vosaea na talopeilopei. ³¹God mo tahea aulu na matuana mo vaia mo pulon mauri nike ale Jujuri matan vara i sile na masapa isan Israel vara la posi, ale i řomi na nora hehe. ³²Kamam kama hite vevuhi la hinau nike, ale Tanume Tapu sei God mo silea isan la haratu la lo ooloo hinia enia sohen mo hitea.”

³³Lara la rongoa sohena la lolokoru patura, ale la opoia vara la vilimateira. ³⁴Pani Pharisee matea hijana Gamaliel, enia tamlohi vujangi mata leu matea. Tamlohi la lo sile na ooloo isana matan la opoia, mo turu na naho council ale mo vereea vara la tau nařihira na jingoima tako. ³⁵Moiso mo vereea isan council atu mara, “La tavgavuın Israel, mo řuhu vara řa lo kilau i řuhu na sava řa opoia vara řa vaia isan la tamlohi nike. ³⁶Matan tauni mo visa mo vano moiso nahai, Theudas mo turu mo vereea mara enia tamlohi tavera matea, ale korong tamlohi mo ngavulu sangavulu vati (400) la usuria. Pani hitahuna hai la vilimateia ale nona tamlohi la taskara, ale nona řomřomi atu mo mai hina purongo. ³⁷Ale hitahun haratu mara Galilee matea hijana Judas, mo turu hin rani atu la lo evi na tamlohi, ale mo vai na tamlohi la lo usuria mata valum. Enia sohena mo mate, ale nona tamlohi usuri tari la taskara.

³⁸Ale matan haratu, noku retituetueni isamim enia mo sohen harihi: vara ha toho asau hinira ha tinařihira, matan vara řomřomi sei la lo vujangia teni hinau sei la lo vaia mo tai isana tamlohi purongo i pa mele mai hina purongo, ³⁹pani vara mo tai isan God, ha sopo eři horora, vara i vono ha pa hiteulia vara ka lo valum peresi God.” Ale la tatauri na nona řomřomi, ⁴⁰ale la mele tovi na vahařule la mele unu, ale la tamajira, moiso la vereea isara vara la pa sopo mele retireti na hijan Iesu, ale la tinařihira. ⁴¹La vahařule atu, la malue hin matavuhi tavera atu. La avulahi matan God mo hitea vara mo tataholo vara la lavi na rani řilangi mata hijan Iesu. ⁴²Ale na rani hatehateahi na lolo Temple peresi na imara, la lo vujangi ale la retivujavujangi na Retiřuhu vara Iesu enia Křisto atu tamlohi la lo kilau matana.

Deacon Mo Limaravrua

6 ¹Hin rani atu evi tamlohi usuri non Iesu mo lo ulua, ale retireti matea mo malue isana Jew sei la retireti na leo mara Greek. Ale la sopo avulahi na Jew sei la lo retireti na leon tavgavuın Israel, matan tarea vara la ase na hanhani nora malepu la sopo lavi tea. ²Ale la tupu sangavulu řomana mo rua atu la tovi matavuhi na tamlohi usuri la mai, ale lara, “Mo sopo tataholo vara kama tinařihi na vujangi mata reti non God mata kilau na hamim hinau. ³Pani ha viřoni mamahuni te vorai kalesia i limaravrua isamim tamlohi tari sei ka levosahia vara Tanume Tapu peresi na lelevosahi mo mařivi hinira, ale řa pa taura la aulu hin la

hinau sei. ⁴Pani kamam kama pa tau na řomimam tari mata usiusi, ale na vavahinau mata Retiřuhu.”

⁵Tamlohi tari la avulahi hin řomřomi atu, ale la viřoni Stephen, tamlohi matea sei mo jea na nona rasua ale Tanume Tapu mo mařivisia, la viřoni Philip, Prochorus, Nicanor, Timon, Parmenas peresi Nicolaus mara Antioch matea enia tamlohi řořoha matea pani mo usuri na nora rasua, moiso mo posi mo mai tamlohi kalesia matea. ⁶La vao atu la vaira la turu na naho vahařule, ale la vahařule atu la tau na limara hinira, ale la usiusi matara.

⁷Reti non God mo lo vano, ale evi tamlohi usuri Jerusalem mo lo sahe aulu jea. Ale vao tavera matea mata přis la lavi pa rasua atu ale la ooloo hinia.

⁸Stephen, tamlohi matea sei mo mařivi na hina řuhuřuhu peresi na suiha God mo silea isana, mo vai na matamata tavera na naho tamlohi. ⁹Pani tamlohi hai Jew na vao matea la tovia ‘Ima Lotu Nona Tamlohi Materi’. Hai la mara Cyrene, mara Alexandria, tatuara la tai Cilicia peresi Asia, la turu la vasi peresi Stephen. ¹⁰Pani la sopo eři rethoro na lelevosahi sei Tanume Tapu mo silea isana vara mo retireti.

¹¹Ale la haluhalu na tamlohi hai vara la vere te hinau halu hin Stephen lara, “Kama rongoa mo retisati hin Moses enia God.” ¹²La halu na tamlohi, peresi na vajiahara tolu na tamlohi vujangi mata leu, moiso la mai isan Stephen, la tauria ale la vaia mo turu na naho council. ¹³Pa la tuetueni halu atu lara, “Tarea tamlohi nike mo lo retisati hin jara tapu nike peresi na leu. ¹⁴Matan kama rongoa mo vere mara Iesu mara Nazareth i pa komo jara nike, ale mo posi na posposi sei Moses mo lo silea mo sinai mo kakauřa nake.” ¹⁵Tamlohi tari hin matavuhi atu sei la lo sakele atu, la hite na nahon Stephen mo posi sohena naho angelo matea.

Stephen Mo Sile Na Nona Reti

7 ¹Ale přis aulu mo vere isan Stephen mara, “La hinau atu la varařuhu?”

²Ale Stephen mara, “La vorai peresi na vajiaha, ha tapurongo na noku reti. God mata mera tavera mo pala isan nořa pua Abraham hin rani atu mo lo toho Mesopotamia, moiso mo pa vano mo toho Haran, ³ale mo vere isana mara, ‘O malue na jaram peresi na tahisam, ale o vano na jara matea enau a pa vujangia isam.’ *Gen 12.1*

⁴Ale mo malue na jara mara Chaldea, mo vano mo lo toho Haran. Hitahu, tamana mo mate, ale God mo tinařihia atu mo taua hin jara nike nake řa lo toho hinia. ⁵Pani mo sopo sile te tavaluna hatelete isana sohena koruna, pani mo retitauhi isana vara i pa silea isana sohena nona peresi na tianiana sei la pa usuria, hina purongo vara mo sopo te natuna.

⁶Pani God mo mele retireti isana sohen harihi mara, ‘Mahapim la pa vinano na jara tamlohi tinapua, ale tamlohi hin jara atu la pa vaira la slev, la pa vailejlejira mata tauni i ngavulu sangavulu vati. ⁷Pani a pa sile na talai isan la haratu la lo slev nora, *Gen 15.13-14* moiso hitahu la pa malue hin jara atu la mai la lotuau nike.’ *Exo 3.12*

⁸Ale mo sile Abraham na retitauhi mata taiřalihi, ale Abraham mo mai taman Isaac, ale mo taiřalihia na halimaravtolu rani nona vora, ale Isaac mo mai taman Jacob, ale Jacob enia taman la pua atu tupu sangavulu řomana mo rua.

⁹Ale la pua atu, la mereimerei hin Joseph, la ařehia mo sivo Egypt; pani God mo lo toho peresia ¹⁰matan vara i pa juria na nona rani řilangi tari, ale i tuenia na lelevosahi na nahon Pharaoh, supe non Egypt matan vara Pharaoh i avulahi hinia ale mo tahea vara i aulu Egypt peresi na hinau tari nona.

¹¹Hin rani atu marua tavera matea mo vili na jara tari Egypt peresi Canaan na rani řilangi. Ale nořa pua la sopo eři hite te hanhani. ¹²Pani na rani Jacob mo rongoa vara hanhani mo lo toho Egypt, mo řule na nořa pua la sivo, harihi enia nora tiroma hahau hin jara atu. ¹³Ale na nora harua hahau la sivo atu, Joseph mo hase vuhesia isana voraina, ale Pharaoh mo pa levosahi na vaon Joseph natu. ¹⁴Moiso Joseph mo řulera la mele sahe, ale la usi Jacob tamana peresi na tamlohi tari na ruhuruhuna sei enira mo isoiso mo ngavulu limaravrua mo lima vara la sinai. ¹⁵Ale Jacob mo sivo Egypt mo pa mate atu, enia peresi na nořa pua, ¹⁶ale la lavi na suira la sahe la taura Shechem na papa sei Abraham mo volia isan natun Hamor atu Shechem.

¹⁷Pani rani mata retitauhi non God sei mo silea isan Abraham mo mai mariviti, tania Abraham la mařivi jea Egypt, ¹⁸mo tikeli rani atu supe tinapua matea mo tauri na suiha Egypt, ale enia mo sopo opoia vara i levosahi na mahapin Joseph. ¹⁹Mo haluhalu na tahisařa, ale mo vere na nořa pua vara la tau na natura la toho hasera na jara tavera matea matan vara la pa mate ea.

²⁰Hin rani atu Moses mo vora, God mo avulahi hinia. Ale tamana la jarohia na ima mata vitu mo tolu, ²¹ale hin rani atu la lavia mo pala na jara tavera venatun Pharaoh mo tapaia mo korohia sohena natuna. ²²Ale la vujangia na lelevosahi tari nona mara Egypt, ale enia mo mai tamlohi řuhu matea mata retireti peresi na nona vavahinau.

²³Na rani taunina mo ngavulu vati, řomina mo mai vara i vano i hite na tasina, mahapin Israel. ²⁴Moses mara mo hite na mara Egypt matea mo lo vailejeji na tahisana matea, mo tueni tahisana atu mo vilimatei pa mara Egypt atu. ²⁵Moses mo lo řomřomia vara tahisana la pa hitevosahia vara God mo řulea mo mai isara vara i jurira, pani la sopo hitevosahi na sava mo lo vaia.

²⁶Ale mo mele rani sahe mo mele pala, ale mo hite na tamlohi tavitavin Israel mo rua la lo vasvasi, ale mo vaihitea vara i tau na tamata isara mara, ‘La tapala, kamim vorai matea purongo, mata sava ka lo vailejleji kamim?’

²⁷Pani tamlohi atu sei mo lo vailejleji na tahisana purongo, mo sohai nañihi Moses, ale mo vereea mara, ‘Hare mo vaiho ko aulu vara o eñi ari kamam?’ ²⁸Ko opoia vara o mele viliau sohen ko vili mara Egypt atu nanovi teni?’

Exo 2.14 ²⁹Tamlohi atu mara mo vereea sohena, Moses mo rovo mo vano mo vinano na jara mara Midia, ale hin jara atu mo mai tama matea natuna lamane mo rua.

³⁰Ale mele tauni mo ngavulu vati tinapua angelo matea mo pala isana na jara hasetoho na vutin Sinai na pepe hapu na pulo pahai matea mo lo hani. ³¹Moses mara mo hitea mo mañurahi hinia, ale mara mo mai mariviti vara i hite mamahunia, leon Moli God mo malue hinia mara, ³²‘Enau God non nom pua, God non Abraham, God non Isaac peresi Jacob’. *Exo 3.6* Ale Moses mo savaravara mo matahu vara i mele kilau vano.

³³Ale Moli God mo vereea isana mara, ‘O lavi nañihi na nom sabat matan jara sei ko lo turu hinia enia mo tapu. *Exo 3.5* ³⁴Enau na hite na rani řilangi nona noku tamlohi sei la lo toho Egypt, ale na rongo na nora tangi, ale na sinai vara a lavi nañihira. Ale o mai, a pa řuleho o sivo Egypt.’ *Exo 3.7-10* ³⁵Moses akerihi natu sei la lo řohu hinia lara, ‘Hare mo vaiho ko aulu vara o eñi ari kamam? Tamlohi akerihi natu God mo řulea sohena tamlohi aulu matea, ale tamlohi juri na tamlohi matea na liman angelo atu sei mo lo pala isana hin pulo pahai atu mo lo hani. ³⁶Tamlohi akerihi natu mo tiromara la malue, mo vai na hinau mañurahi peresi na matamata tavera na lolon Egypt, na Tasi Hahara, ale jara tano koru mata tauni mo ngavulu vati.

³⁷Moses akerihi natu sei mo vereea isana tavitavin Israel mara, ‘God i pa turuhi na nomim pñovet matea isana voraimim soheku’. *Deut 18.15*

³⁸Tamlohi akerihi natu, mo lo toho na lolon vao atu na jara hasetoho peresi angelo atu sei mo lo retireti isana, peresi na noña pua na vutin Sinai. Ale enia mo lavi na reti sei mo sile na mauri vara i silea isaña.

³⁹Pani noña pua la řohu vara la ooloo hinia, la tau nañihia, ale na mapura la opoia jea vara la mele sivo Egypt, ⁴⁰la vereea isan Aaron lara, ‘O vai te noña god matan la pa tiroma hiniña. Pa Moses atu sei mo lo tiroma hiniña řa malue Egypt, řa sopo levosahia vara mo sopo mele pala mata sava.’ *Exo 32.1* ⁴¹Ale

hin rani atu la vai na hinau matea mo tovongi na natu buluk matea, ale la sile na malamalai isana, ale la lo avulahi na nora vavahinau sei. ⁴²Pani matana, God mo vahañi isara ale mo tinañihira vara la lotu na hinahinau tinatinapu na masapa, mo sohen la ulia moiso na puku nona pñovet lara,

‘Varaŕuhu, kamim Israel

ka lo sile na malamalai isaku na jara tano koru hin la tauni atu mo ngavulu vati?

⁴³ Mo vono, ŕomimim tavera

mo lo toho na nomim god na tent non Moloch,

peresi Rephan god nona vitusarasara,

peresi na tamasin te hinau ka vaira mata ha pa lotura.

Ale matana, a pa ŕule kamim ha vano ha toho asau na tavalun

Babylon na ruhuruhura.’

Amos 5.25-27

⁴⁴ Ale noŕa pua la lo toho peresi na Tabernacle na jara hasetoho, la vaia mo tataholo na sava God mo vereea isan Moses mo usuri na sava mo hitea.

⁴⁵ Hitahuna noŕa pua, la pete lavia hin la rani atu la lo usuri Joshua sei mo lo tiromara na vuro isana tamlohi la sopo levosahi God. Ale God mo tipahira na nahon noŕa pua mo kakau na rani non supe David, ⁴⁶ enia God mo avulahi hinia, ale David mo usi God vara i voro te iman God non Jacob hatea. ⁴⁷ Pani Solomon natu, mo pa voro ima atu. ⁴⁸ Pani God Aulu Jea mo sopo toho na ima tamlohi la vaira, sohena pŕovet mo ulia vara Moli mo vereea mara,

⁴⁹ ‘Moli mo vereea:

Tuka enia noku jara sakele mata suiha,

ale varama enia jara paloku.

Sava ima natu o pa eŕi voroa vara i pa imaku,

teni sava jara enia noku jara mapu?

⁵⁰ Ka ŕomi vara limaku mo sopo vai vevuhi la hinau nike?’ *Isa 66.1-2*

⁵¹ Ka tamlohi patu ŕilangi, mapumim la ŕoŕoha, ale ka peropero na varaŕuhu. Ka lo ŕohu na Tanume Tapu tarea sohen nomim pua la lo vaia tiroma. ⁵² Sava pŕovet natu nomim pua la sopo tipahia? Ale la vilimatei la haratu sei la lo vereuli na mai non haratu mo tataholo jea sei nake ka turuleji hinia moiso, ale ka vilimateia. ⁵³ Kamim akerihi natu, ka sopo ooloo na leu non God sei mo silea isamim na lima angelo.”

⁵⁴ La tamlohi atu sei la lo tapurongo isan Stephen lara la rongo la hinau atu, la lolokoru patura, la hatihati na huŕura matana. ⁵⁵ Pani Tanume Tapu mo sohoni Stephen, ale mo taŕa sahe aulu na tuka, ale mo hite na hasohason God, ale mo hite Iesu mo lo turu na matuan God. ⁵⁶ Ale mo vereea mara, “Ka hitea, na hite tuka mo roi, ale na hite Natun Tamlohi mo lo turu na matuan God.”

⁵⁷ Pani la ulo na leo tavera matea ale la jongi na perora ale vahatea la kue la tauria. ⁵⁸ Moiso, la lavi naŕihia la vano na jingoiman taon tavera atu, la pulahia atano vara la pa parumateia. Ale la tamlohi atu sei la lo rongo na nona reti, la lanāŕihi na nora ruru tavera matan vara la eŕi paruparu, ale la taura na palo uluvou matea hijana Saul.

⁵⁹ Ale na rani la lo parua, Stephen enia mo lo usi mara, “Moli Iesu, o lavi na tanumeku.” ⁶⁰ Ale mo jovi sivo na pauna mo ulo mara, “Moli, o

sopo taurilatira matan hehe akerihi.” Mo vere hinau atu moiso, natu mo mate.

8 ¹Ale Saul mo majinga na mateia non Stephen.

La Tipahi Na Kalesia

Ale mo tapulo hin rani atu tamlohi la tipahi na vao kalesia Jerusalem la levuti jalajalaira la vano na jara tari Judea peresi Samaria, pani vahaŕule purongo la pa lo toho atu. ²Tamlohi hai sei řomira mo řilangi mata lotu God tarea la tavuni Stephen, ale la vai na tangi tavera matana. ³Pani Saul, mo opoia vara i vaikomokomo na kalesia tari, mo lo unu jongi na tamlohi rasua na ima hatehateahi, mo reve tahitahi na tamlohi peresi na haŕai ale mo taura na ima řilangi.

Philip Mo Retivujavujangi Samaria

⁴Ale la kalesia atu sei la lo levuti jalajalaira, la vano la lo retivujavujangi na Retiřuhu. ⁵Philip mo sivo na taon tavera matan Samaria ale mo lo retivujavujangira hin Křisto. ⁶Ale vao tamlohi tari atu la lo tapurongo mamahu na sava mo lo verera, ale matan la hite na matamata tavera mo lo vaira. ⁷Matan tanume lumiha sasati la lo malue na tamlohi matuvana sei la lo toho hinira, ale lara la malue la lo ulo řilangi, ale la haratu la řira teni la papao la řuhu. ⁸Ale avulahi tavera mo lo toho hin taon tavera atu Samaria.

⁹Tamlohi matea hijana Simon enia mo lo mahumahu na suihan tiapolo ale mo lo vai na hinau mařurahi tavera hin jara atu mo tuai moiso, mo lo vere vara enia tamlohi tavera matea. ¹⁰Tamlohi tari la lo tapurongo hinia, mo tapulo na tamlohi purongo mo tikeli la haratu la aulu lara, “Tamlohi akerihi enia mo lavi suiha atu non God sei la lo vere vara mo tavera jea.” ¹¹Ale tamlohi la lo tapurongo mamahu isana matan la lo mařurahi na nona mahumahu tuai moiso mo mai. ¹²Pani lara la rasu Philip matan mo lo retivujavujangi na Retiřuhu matan mauri atu God mo aulu hinia, tamlohi peresi na haŕai la tapulo lavi na paptijo na hijan Iesu Křisto. ¹³Simon sohena mo rasua, ale hitahu na nona paptijo mo usuri Philip. Ale mara mo hite na matamata peresi na hinau mařurahi tavera mo lo vaira, mo hutua.

¹⁴Ale la vahaŕule atu Jerusalem lara la rongoa vara mara Samaria la lo lavi na reti non God, la řule Peter enia John ¹⁵la sivo isara la usiusi nora matan vara la pa eři lavi na Tanume Tapu, ¹⁶matan enia mo sopo lo jovi isan te vonara hatea, pani enira la lavi na paptijo na hijan Moli Iesu purongo. ¹⁷Ale Peter enia John la tau na limara hinira, ale la lavi na Tanume Tapu.

¹⁸Simon mara mo hitea vara Tanumen God mo lo mai na tamlohi vara la vahaŕule atu la tau na limara hinira purongo, mo usia vara i eři silera

hin te mania ¹⁹mara, “Ha sileau hin suiha sei matan vara sava tamlohi na tau na limaku hinia enia sohena i pa lavi na Tanume Tapu.”

²⁰Pani Peter mo vereia isana mara, “Mo ŋuhu vara nom mania i tihai peresiho matan ko ŋomi vara o eŋi voli na otori non God na mania.

²¹Engko o sopo eŋi lavi te tavalun hinau nike matan mapum mo sopo tataholo na nahon God. ²²Matan haratu, o posi na nom ŋomŋomi hehe, ale o ususi isan God matana, matan vara i avulahi, i pa ŋomiho matan nom ŋomŋomi sei. ²³Matan na hitea ko maŋivi na mereimerei ale hehe mo taurilatihu.”

²⁴Ale Simon mo ŋaramia mara, “O ususi matakū isan Moli matan vara sava sei ko vereia moiso tea i sopo masese isaku.”

²⁵Ale hitahun la vereuli mamahuni la reti atu non Moli, Peter enia John la mele hilu sahe Jerusalem, ale la retivujavujangi na Retiŋuhu isana vanua mara Samaria matuvana na malelera la lo sahe.

Tamlohi Aulu Mara Ethiopia Matea

²⁶Ale angelo matea mo vereia isan Philip mara, “O turu o vano o sivo na malele sei mo tai Jerusalem mo lo vano Gaza.” Jara atu enia jara hasetoho matea. ²⁷Ale mo turu mo vano. Hin jara atu mo hite na mara Ethiopia matea mo povota, enia tamlohi aulu matea matan Candace, vesupe nona mara Ethiopia. Enia natu mo lo kilau na nona tavgav tari. Mo mai Jerusalem mata lotu, ²⁸ale mo lo mele mule, mo lo sakele na nona kati, hos la lo revea mo lo evi na reti non pŋovet Isaiah.

²⁹Ale Tanumen God mo vereia isan Philip mara, “O vano o hahau na pahisa nona kati.”

³⁰Ale Philip mo maro mo vano isana, ale mo rongoa mo lo evi na reti non pŋovet Isaiah, ale mo usia isana mara, “Ko levosahi na sava ko lo evia?”

³¹Ale mo ŋaramia mara, “A pa levosahia sohena sava vara tea i sopo vujangiau hinia?” Ale mo usi Philip vara i vele i sahe i sakele peresia.

³²Jara rihirihi atu mo lo evia na Retitapu enia harihi,

‘La tiroma hinia sohena sipsip matea mo vano matan vara la vilimateia,

ale sohena natu sipsip matea sei mo lo tapanono purongo vara tamlohi tai na vulu mo lo tai na vuluna,

ale mo sopo vere te hinau hatea.

³³Na rani la vailejleja

mo sopo tea i turu vara i tuenia.

Mo sopo te taniaa vara i eŋi lavi na koruna.

Matan la lavi naŋihi na maurina na varama.’

Isa 53.7-8

³⁴Ale pa tamlohi atu sei la votaia mo usi Philip mara, “Isaiah enia mo lo retireti hin enia hasena teni mo lo vere te tamlohi tinapua?” ³⁵Ale

Philip mo vereuli na Retiřuhu hin Iesu isana mo tapulo hin jara rihirihi atu na Retitapu.

³⁶Ale lara la lo vano la mai na pahisa wai matea, ale pa tamlohi atu sei la votaia mara, “O to kilau vano, wai sevano! Mo sopo lo tataholo vara a lavi na paptijo?”

³⁷⁻³⁸Ale mo vereva mara nona kati i turu, ale enira rua la sevuti la sivo na wai, ale Philip mo paptijo hinia.

³⁹Ale mara mo malue na wai, Tanumen Moli mo lavi nařihi Philip na nahona. Pa tamlohi atu mo sopo mele hitea pani na malelena mo lo vano mo avulahi tavera. ⁴⁰Ale Philip mo pa hutua purongo mo lo turu hin taon atu Azotus, ale mo retivujavujangi na Retiřuhu atu peresi na taon tari sei na malelena vavano mo kakau Caesarea.

Iesu Mo Horo Saul, Mo Viřonia Nona

(Acts 22.6-16; 26.12-18)

9 ¹Hin rani atu Jerusalem, Saul mo lo vereva řilangi vara i pa vilimatei na tamlohi usuri non Moli, ale matana mo vano isan přis aulu. ²Ale mo usia vara i uli te leta vara i lavira la sahe isana ima lotu nona Jew Damascus, mata usia vara la turu peresia vara la taurilati la haratu la lo usuri na malelen Křisto, hina purongo vara tamlohi teni hařai. Ale vara i lihora i lavira la mele sahe Jerusalem.

³Saul mo lo sahe Damascus, mo pa lo mai mariviti, mera tavera matea mo tai na tuka mo eři tuntunia. ⁴Mo jovi sivo na lepa, ale mo rongo na leo matea mo vereva mara, “Saul! Saul! Mata sava ko lo tipahiau?”

⁵Ale Saul mo usia mara, “Tamlohi tavera, engko hare?”

Ale leo atu mo řaramia mara, “Enau sei Iesu! Haratu sei ko lo tipahia. ⁶Pani nakerihi o turu, o vano o unu na lolon taon tavera atu ko lo mai matana, ale tamlohi matea i pa vereho na sava o pa vaia.”

⁷La tamlohi atu sei la lo hahau peresi Saul la turu tapanono vahatea matan la rongo leo atu, pani la sopo hite na tamlohina. ⁸Ale Saul mo mele turu, matana mo lo roi pani mo sopo eři hite te hinau. Nona tamlohi la tauri na limana la tiroma hinia la sahe Damascus. ⁹Ale Saul mo matavuso mata rani mo tolu. Mo řohu na hanhani peresi na wai hin la rani atu.

¹⁰Tamlohi usuri matea hijana Ananias mo lo toho atu Damascus. Moli mo pala isana na hinau matea sohena mavuho mara, “Ananias!”

Ananias mo řaramia mara, “Enau sei Moli!”

¹¹Moli mo vereva isana mara, “O turu o vano hin malele atu la tovia ‘Tataholo’ ale atu na iman Judas o usi na mara Tarsus matea hijana Saul, ale nakerihi mo lo usiusi, ¹²ale hinau matea sohena mavuho enia mo hite na tamlohi matea hijana Ananias mo mai mo tau na limana hinia matan vara i eři mele kilau.”

¹³Pani Ananias mo řaramia mara, “Moli, tamlohi matuvana la vereau na sava hinau sasati tamlohi atu mo lo vaia isana nom tapuhi Jerusalem. ¹⁴Ale nahai nike mo lo lavi na suiha isana pñis aulu Jerusalem vara i taurilati la haratu la lo rasuho vara engko Moli!”

¹⁵Pani Moli mo vereau isana mara, “O vano matan enau na viřonia mata vavahinau matea vara enia i pa lavi na hijaku i vano isana tamlohi řořoha, ale isana supe, ale isana Jew. ¹⁶Matan enau a pa vujangia vara i pa lavi na rongohaji mata hijaku.”

¹⁷Ale Ananias mo malue mo vano mo unu hin ima atu. Mo tau na limana hinia, ale mara, “Voraiku Saul, Moli Iesu sei mo lo pala isam hin malele sei ko lo mai hinia, mo řuleau na mai isam matan vara o eři mele kilau, ale Tanume Tapu i mařivisiho.” ¹⁸Vahatea purongo hinau hai sohena langalanga maji la jovi na matan Saul, ale mo mele kilau, moiso mo turu ale la paptijo hinia; ¹⁹ale mara mo hanhani, mo mele suiha. Saul mo lo toho peresi na tamlohi usuri non Moli makomona atu Damascus.

Saul Mo Mele Sahe Jerusalem

²⁰Ale vila řuhu purongo, Saul mo tapulo retivujavujangi Iesu na ima lotu nona Jew mara, “Varařuhu Iesu enia Natun God.”

²¹Ale tamlohi tari sei la rongoa la mařurahi tavera hinia lara, “Avei, mo sopo tamlohi nike natu sei mo lo vailejleji la haratu Jerusalem sei la lo vereau vara Iesu enia Moli? Ale nona mai nike nake mo sopo matan vara i mele vaia sohena, matan vara i liho kamam ale i lavi kamam kama vano isana moli nona pñis Jerusalem?”

²²Pani suihan Saul mata retivujavujangi mo mai mo mele řilangi jea, ale mo ari posposi na Jew sei la lo toho Damascus matan mo lo vujangi mamahunia vara Iesu enia Křisto atu la lo kilau matana. ²³Mo sopo tuai, tamlohi tavera nona Jew atu Damascus la hatihia vara la pa vilimateia, ²⁴pani Saul mo levosahi nora řomřomi luhu atu. La lo kilau na mataruan taon tavera atu na rani na vutepongi matan vara la pa eři vilimateia. ²⁵Pani na vutepongi matea, nona tamlohi usuri la tuhua na tanga matea na mařole matea na roro ropon atu.

²⁶Ale hin rani atu, Saul mo pala Jerusalem mo vaihitea vara i pulutahi peresi na tamlohi usuri non Moli ea. Ale enira mo isoiso la matahunia matan la sopo rasua vara enia tamlohi usuri matea. ²⁷Pani Barnabas mo vano mo lavia mo mai isana vahařule, ale mo vereulia isara sohena sava Saul mo hite Moli na malele, ale mo vereuli na sava Moli mo vereau isana, ale sohena sava mo lo retivujavujangi řilangi na hijan Iesu Damascus.

²⁸Ale tamlohi usuri la pa avulahi hinia natu vara i lo toho peresira, ale nona retivujavujangi Jerusalem na hijan Moli mo řilangi jea. ²⁹Ale mo sorasora peresi na mara Jew atu sei la retireti na leo mara Greek, ale mo vasi peresira, pani la lo tiasia vara la vilimateia. ³⁰Ale vorai kalesia atu

lara la levosahia, la lavia mo sivo Caesarea, ale la řule nařihia mo sahe Tarsus.

³¹Matan haratu, kalesia na jara tari Judea, Galilee peresi Samaria la toho na tamata, la ulua la řilangi ale evira mo tavera. Ale na maurira la sile na ooloo isan Moli ale la lo toho na nanauhi non Tanume Tapu, ale la ulua mo tavera jea.

Peter Enia Dorcas

³²Ale, Peter mo lo hahau řalihi ale na malelena mo sivo isana tapuhi non Moli Lydda. ³³Hin jara atu mo tapai na tamlohi papao matea hijana Aeneas sei mo lo juruvi na vatana mata tauni mo limaravtolu moiso. ³⁴Ale Peter mo vere a isana mara, “Aeneas, Iesu Křisto mo vai mamahuniho; o turu o vai na vatam.” Ale vahatea purongo mo turu. ³⁵Ale tamlohi tari Lydda peresi Sharon la hitea, ale la posi mai isan Moli.

³⁶Hin rani atu tamlohi usuri hařai matea mo lo toho Joppa, hijana na leo Jew enia Tabitha, ale na leo mara Greek enia Dorcas. Tarea mo lo vai na vavahinau řuhu ale mo lo tueni na tilavono. ³⁷Hin la rani atu mo rojo ale mo mate. Ale lara la hoje na tarapena moiso la taua mo juruvi na jara tinapua matea aulu hin ima atu. ³⁸Pani matan Lydda mo lo toho mariviti Joppa, tamlohi usuri atu lara la rongoa vara Peter mo lo toho atu, la řule na tamlohi mo rua la vano isana vara la usia řilangi vara, “Kama opoia mo tavera jea vara o mai nakerihi purongo.”

³⁹Ale Peter mo turu mo usurira la vano. Ale mara mo pala, la lavia mo sahe aulu isan Dorcas. Malepu tari la lo turu na pahisana la lo tangi, ale la lo vujangi na ruru peravu peresi te ruru tinatinapua Dorcas mo vaira na rani mo pa lo mauri. ⁴⁰Pani Peter mo řulera enira mo isoiso vara la malue, ale mo papaohi mo ususi, ale mo posi vano isan tarape atu mara, “Tabitha, o turu.” Ale mo roi na matana, ale mara mo hite Peter, mo sakele tataholo. ⁴¹Ale mo sohai na limana vano isana ale mo sau. Moiso mo tovi na tapuhi peresi la hařai malepu atu vara la mai ale mo vujangia isara vara mo mele mauri.

⁴²Ale sorasorahina mo řalihi na jara tari Joppa, ale tamlohi matuvana la tau na nora rasua hin Moli. ⁴³Ale Peter mo lo toho atu Joppa mata rani matuvana peresi na tamlohi matea hijana Simon mo lo vavahinau na huri maji.

Cornelius Mo Vahařule Matan Peter

10 ¹Atu Caesarea tamlohi matea, hijana Cornelius, enia captain mata tamlohi vuro mo lo kilau na vao tamlohi vuro mara Rome matea evira mo ngavulu sangavulu mo limarave (600), ²enia tamlohi matea řomina mo řilangi mata lotu God, ale mo lo sile na ooloo isana tolu na vao imana, ale nona silesilea mo řuhu jea isana tamlohi, ale mo

lo usiusi tarea isan God. ³Matan alo mariviti i tolu na ravravi matea, mo hite na hinau matea sohena mavuho matea, ale mo hite na angelo non God matea mo mai mo vereea isana mara, “Cornelius!”

⁴Ale mo kilaua na matahu tavera ale mara, “Eh, sava tamlohi tavera?”

Ale mo vereea isana mara, “Nom usiusi peresi na nom silesilea la sopo sahe aulu purongo na nahon God. ⁵Ale nakerihi, o řule te tamlohi la sivo Joppa la lavi Simon tapala hijana Peter. ⁶Enia mo lo toho peresi na tamlohi matea hijana Simon sei mo lo vavahinau na huri maji, ale imana mo lo toho na pahisa tasi.”

⁷Angelo atu mara mo lo retireti isana moiso mo malue, ale Cornelius mo tovi na nona volitusi mo rua peresi na tamlohi vuro matea sei mo rasua mo tavera jea ale mo řulera isan la haratu la lo volitusi isana, ⁸mo vere na sava mo masese isana isara, ale mo řulera la sivo Joppa.

Sava God Mo Vujangia Isan Peter

⁹Mo mele rani sahe la pa lo mai mariviti hin taon tavera atu, Peter mo sahe aulu na pusa ima na livuha rani mata usiusi. ¹⁰Ale mo marohati, mo opoia vara i hani te hinau, pani la pa lo tatamahunia, hinau matea sohena mavuho mo taurilati na řomina, ¹¹ale mo hite tuka la roi ale hinau matea sohena tavalu ruru tavera jea matea mo lo sinai atano, la tuhua mo lo sinai atano na varama hin la pingona atu mo vati. ¹²Mo hite na maji tinatinapua matuvana, maji haraho peresi na maji avuavu la lo toho na lolona. ¹³Ale leo matea mo malue mo vereea isana mara, “O turu Peter; o vilimatei tea o hania!”

¹⁴Pani Peter mara, “A sopo eři vaia sohena Moli; matan na sopo lo hani te hinau lumiha hatea sei leu mo horoa!”

¹⁵Ale leo atu mo mele mai isana haruana mara, “Sava God mo vaia mo vokevoke, o sopo vereea vara mo lumiha!” ¹⁶Ale hinau sei mo masese sohena vaha tolu moiso, ale vahatea purongo mo mele sahe aulu na tuka.

¹⁷Ale řomin Peter mara mo pa lo toho na řaramin hinau atu mo hitea, vahatea purongo, pa la tamlohi atu sei Cornelius mo lo řulera la kakau na iman Simon la turu na get.

¹⁸Ale la ulo la usia lara Simon matea tapala hijana Peter mo lo toho atu teni mo vono. ¹⁹Peter mo pa lo řomřomi hinau atu mo lo hitea, ale Tanume Tapu mo vereea isana mara, “Nakerihi, tamlohi tupu tolu la lo aleho. ²⁰O turu, o sivo atano, řomim i sopo kaka hinira, ale o usurira matan enau sei na řulera.”

²¹Ale Peter mo sevuti sivo isara ale mo vereea mara, “Enau natu haratu ko lo alea. Ka mai mata sava?”

²²Ale la vereea lara, “Cornelius, enia captain mata tamlohi vuro matea, mo lo kilau na vao tamlohi vuro mara Rome matea, ale enia tamlohi tataholo matea sei mo lo sile na oloolo tavera isan God. Ale Jew la lo vereea

vara enia tamlohi řuhu matea; angelo tapu matea mo vereea isana mara i vahařule matam matan vara o mai na imana ale i pa rongo na sava o pa vereea isana.”²³ Ale Peter mo usira vara la pa toho atu peresia hin rani atu.

Mo mele rani sahe mo turu mo usurira, ale tatua vorai sei mara Joppa la vano peresia.

²⁴Mo mele rani sahe la unu Caesarea. Cornelius mo lo kilau matana moiso, ale mo tovi matavuhi na tahisana peresi na tavgavuina peresi na tapalana řuhuřuhu la lo saovia. ²⁵Peter mara mo unu, Cornelius mo tapaia, mo jovi sivo na palona ale mo lotua. ²⁶Pani Peter mo sau sahe aulu mara, “O turu, enau tamlohi matea sohem purongo!” ²⁷Mara mo lo retireti peresia mo unu mo hite na vao tavera la lo takonahi saovia.

²⁸Ale mo vereea isara mara, “Kamim hasemim ka levosahia vara mo sopo tataholo vara Jew matea i pulutahi teni i rohi te tamlohi mara jara tinapua, pani God mo vujangia isaku vara a sopo tovi na tamlohi tinapua sohena tamlohi lumiha matea na nahon God. ²⁹Ale kara ka vahařule matakū, na mai tataholo vahatea. Ale nake, na opoia vara a usia vara mata sava ka vahařule matakū?”

³⁰Ale Cornelius mara, “Rani mo vati mo vano moiso, korong matan alo mo tolu natu na ravravi, na lo usi na imaku, ale vahatea purongo, tamlohi matea mo turu na nahoku mo ru na ruru la memera ³¹ale mo vereea mara, ‘Cornelius, God mo sopo řomaliho na nom usi peresi na nom silesilea. ³²Ale matan haratu o řule tea la sivo Joppa la usi na tamlohi matea hijana Simon tapala hijana Peter. Enia mo lo toho na iman Simon, tamlohi vavahinau na huri maji matea na pahisa tasi.’ ³³Ale na vahařule matam vahatea, ale engko ko řomřuhu ko mai. Ale matana nakerihi, kamam mo isoiso kama lo toho na nahon God vara kama rongo vevuhi na sava mo retileu hinia isam vara o vereea isamam.”

Iman Cornelius La Rongo Na Retiřuhu

³⁴Ale Peter mo tapulo retireti mara, “Varařuhu, nake natu na pa levosahia vara God mo sopo tametame tea, ³⁵pani sava tamlohi na sava jara sei mo lo sile na ooloo isana, ale mo vai na hinau tataholo, enia mo avulahi hinia. ³⁶Ale ka levosahi retisohai atu sei mo lo silea isana tavgavuin Israel, mo retivujavujangi na Retiřuhu mata tamata hin Iesu Křisto enia Moli nona tamlohi tari. ³⁷Kamim ka levosahi vevuhi na sava mo masese Judea, mo tapulo Galilee hitahun paptijo atu John mo lo retivujavujangia ³⁸hin Iesu mara Nazareth sei God mo viřonia na Tanume Tapu ale peresi na suiha. Enia mo hahau řalihi mo lo vai na hina řuhu, mo vai na rojoa la tihai hin la haratu tiapolo mo lo vailejlejira matan God mo lo toho peresia.

³⁹Kamam kama hite vevuhi la hinau sei na matamam mo vaira Judea peresi Jerusalem. La vilimateia na talopeilopei matea, ⁴⁰pani God mo

sauteterahia na hatolu rani, ale mo tinañihia vara i pala, ⁴¹mo sopo isana tamlohi tari, pani isamam sei God mo pete viñoni kamam moiso vara kama pa hitea. Hitahun haratu mo lo turu na mateia, kamam natu, kama hanhani ale kama inu peresia. ⁴²Mo retileu isamam vara kama retivujavujangi na tamlohi ale vara kama retiñoañoahaira vara enia natu haratu God mo viñonia vara i pa ari la haratu la mate peresi la haratu la lo mauri. ⁴³Přovet tari la vereulia vara sava tamlohi sei mo tau na nona rasua hinia, God i pa řomi na nona hehe na hijana.

Tanume Tapu Mo Jovi Isara

⁴⁴Peter mo pa lo vere la hinau atu, Tanume Tapu mo jovi isan la haratu enira mo isoiso sei la lo tapurongo na nona reti. ⁴⁵Tamlohi řořoha sei la lo usuri Peter, la mařurahi tavera matan God mo surei na Tanume Tapu isana tamlohi řořoha sohera. ⁴⁶Matan la rongora la lo retireti na leo tinatinapua la lo tahe na hijan God, moiso Peter mo verea mara, ⁴⁷“Hare natu i eři horo na wai vara la tamlohi nike la sopo paptijo hinia? Matan enira sohena la lavi na Tanume Tapu soheřa moiso.” ⁴⁸Ale mo retileu isara vara la pa paptijo na hijan Iesu Křisto. Hitahun haratu, la usia vara i lo toho peresira makomona tako.

Kalesia Jerusalem La Rongo Na Sorasorahin Cornelius

11 ¹Ale, vahařule peresi la vorai atu la lo toho řalihi Judea la rongoa vara tamlohi řořoha la lavi na reti non God. ²Ale Peter mara mo sahe Jerusalem, Jew kalesia hai la verelejeleja lara, ³“Avei, ko vano isana tamlohi řořoha, ale ko hanhani peresira.”

⁴Pani Peter mo tapulo vereuli na sava mo masese mo tapulo na tapulona mara, ⁵“Na lo toho na taon tavera matan Joppa na lo ususi, ale hinau matea sohena mavuho matea mo pala isaku, ale na hite na hinau matea sohena tavalu ruru tavera jea matea mo lo sinai atano mo tai na tuka ale la tuhua hin la pingona atu mo vati mo sinai tataholo isaku.

⁶Nara na kilau mamahunia, na hite na maji palo vati hai, maji jala hai, maji haraho hai peresi na maji avuavu tinatinapua hai sei la tapu mata hanira. ⁷Ale na rongo na leo matea mo malue mo verea isaku mara, ‘O turu Peter; o vilimatei tea, ale o hanira!’

⁸Pani na verea nara, ‘A sopo eři vaia sohena Moli; matan na sopo lo hani te hinau lumiha hatea sei leu mo horoa.’

⁹Pani pa leo atu na tuka mo mele řaramiau haruana mara, ‘Sava na vaia mo vokevoke, o sopo eři verea vara mo lumiha.’

¹⁰Hinai atu mo masese sohena vaha tolu moiso, la hinai tari atu la pa mele sahe na tuka. ¹¹Vahatea atu, tamlohi mo tolu la pala hin ima atu na lo toho ea, la řulera Caesarea matakau. ¹²Ale Tanumen God mo verea isaku mara a usurira, ale na sopo mele řomřomia vara enira la tamlohi tinapua.

La tamlohi tupu limarave nike natu, la usuriau kama sahe, ale kama unu na iman tamlohi matea Caesarea. ¹³Ale mo vereulia sohena sava mo hite angelo atu mo turu na lolo imana, ale mo vereia isana mara, ‘O ñule tea la sivo Joppa, ale la lavi Simon sei tapala hijana Peter; ¹⁴ale i pa vereuli na retisohai matea sei o pa juri hinia, engko peresi na vao imam.’

¹⁵Nara na tapulo retireti, Tanume Tapu mo jovi hinira sohen mo vaia isaña tiroma. ¹⁶Ale na mele ñomñomi na reti non Moli sei mara, ‘John mo paptijo peresi na wai, pani God i pa paptijo hin kamim na Tanume Tapu.’ ¹⁷Vara God mo silera na otori sohen mo silea isaña hin rani atu ña rasu Moli Iesu Kñisto, enau sava tamlohi vara a eñi horoa?”

¹⁸Lara la rongo la hinau atu la sopo mele retireti, pani la hasohaso God lara, “Varañuhu, God mo tinañihia vara tamlohi ñoñoha la eñi posi, ale la lavi na mauri soheña.”

Vao Kalesia Matan Antioch Matan Syria

¹⁹Ale hin rani atu, la haratu sei la lo tipahira Jerusalem usuri na mate non Stephen, la sahe asau la kakau na jara sohen Phoenicia, Cyprus peresi Antioch. La sopo vere retisohai sei isan te tinapua pani isana Jew sei la lo retireti na leon Israel purongo. ²⁰Pani tatuara enira mara Cyprus enia Cyrene sohena, ale lara la pala Antioch la vereia isana tamlohi ñoñoha sei leora enia mara Greek, la lo retivujavujangi Moli Iesu. ²¹Suihan Moli mo lo toho hinira, ale vao tavera sei la tamlohi ñoñoha la rasua, ale la posi mai isan Moli.

²²Sorasora atu mara mo pala na vao kalesia Jerusalem, ale la ñule Barnabas mo sahe Antioch. ²³Mara mo pala mo hiteuli na vavahinau ñuhuñuhu non God isara, ale mo avulahi mo retituetuenira vara la lo toho ñilangi varañuhu isan Moli, ²⁴matan Barnabas enia tamlohi ñuhu matea, Tanume Tapu mo mañivi hinia, ale nona rasua mo ñilangi, ale matana, tamlohi matuvana la mele mai isan Moli.

²⁵Matana, Barnabas mo vano Tarsus vara i ale Saul, ²⁶ale mara mo tapaia, mo lavia mo sinai Antioch. Barnabas peresi Saul la lo pulutahi peresi vao kalesia atu, ale la vujangi na tamlohi matuvana ea mata tauni matea. Antioch natu, enia tiroma jara sei tamlohi rasua la lavi hija sei — kalesia ea.

²⁷Ale hin la rani atu pñovet hai la tai Jerusalem la sahe Antioch. ²⁸Vonara matea hijana Agabus mo turu, ale mo retimangovi na suihan Tanumen God mara marua tavera matea i pa jovi na varama, ale hinau atu mo masese hin rani atu Claudius mo lo supe nona mara Rome. ²⁹Ale matana, tamlohi usuri Antioch la hatihia vara la pa sile te tuetueni isana voraira peresi na vevoraira sei la lo toho Judea, la pa silea sohena vara la eñi silea. ³⁰Ale la vaia sohena, la sile na nora tuetueni isan Barnabas enia Saul vara la pa silea isan la haratu la lo kilau na kalesia Jerusalem.

La Vilimatei James

12 ¹Hin la rani atu, supe Herod Agrippa mo taurilati na kalesia hai vara i pa vaikomokomora. ²Mo retileu vara la vilimatei James, tasin John na sita vuro. ³Ale mara mo hitea vara Jew la avulahi hinia mo mele taurilati Peter sohena, harihi mo masese na rani Passover. ⁴Mara mo tauria mo taua na ima řilangi, mo taua na lima vao tamlohi vuro mo vati sei tupu vati na vao matea. Herod mo lo řomřomia vara i pa lavi Peter i malue vara i aria na naho tamlohi hitahu na Passover. ⁵Ale Peter mo lo toho atu na ima řilangi, pani vao kalesia Jerusalem la lo ususi řilangi isan God matana.

Angelo Matea Mo Tiroma Hin Peter

⁶Ale hin vutepongi atu sei vara i rani sahe supe Herod i pa vaia i turu na aria, Peter mo lo juruvi na livuha tamlohi vuro mo rua, la liho na limana na jen, ale hai la lo turu na pelatin ima řilangi atu. ⁷Vahatea purongo, angelo matea non Moli mo pala na pahisan Peter na lolon jara atu mo lo toho hinia na ima řilangi, ale mera matea mo merasahi jara atu. Mo hoti Peter na rorona, ale mo řohaia mara, “O turu vila.” Ale jen la jovi nařihi na limana. ⁸Ale angelo atu mo vereea isana mara, “O ruru ale o ru na nom sabat!” Ale mo vaia sohena. Ale mo mele vereea isana mara, “O tavuhoroho na nom ruru tavera, ale o usuriau.”

⁹Ale Peter mo malue mo usuria. Mo sopo levosahia vara hinau atu angelo atu mo lo vaia enia hina varařuhu, pani mo lo řomřomia vara mo lo hite na hinau matea sohena mavuho matea. ¹⁰Ale lara la jeu na tiroma vao tamlohi vuro peresi na harua vao tamlohi vuro sei la lo kilau na ima řilangi, la sahe tataholo na pelati aen sei mata unu hin taon tavera atu. Pelati atu mo hasena roi matara, ale la malue la lo usuri na malele tavera matea, ale vahatea purongo, angelo atu mo tinařihia.

¹¹Ale řomin Peter mara mo mele mai mo hasena vereea mara, “Nakerihi na levosahi mamahunia vara Moli mo řule na nona angelo vara i juriau na liman Herod peresi na hinau tari sei Jew la opoia vara i pa masese isaku.”

¹²Mara mo levosahia, mo vano na iman Mary tinan John sei tapala hijana Mark. Ale tamlohi matuvana la lo pulutahi ea la lo ususi. ¹³Ale mara mo řiřingi na pelatin rope ima atu, hařarihi volitusi matea hijana Rhoda mo mai vara i roi. ¹⁴Mara mo rongovosahi na leon Peter, na nona avulahi mo sopo roi na pelati pani mo maro mo mele unu na ima mo vereulia isara vara Peter mo lo turu na pelati.

¹⁵La vereea isana lara, “Ko to, ko putu teni?” Pani mo vereea mo řilangi mara mo varařuhu, ale enira la lo vereea vara, “Enia nona angelo!”

¹⁶Pani Peter mo lo řiřingi ale enira lara la roi, la hitea ale la mařurahi tavera. ¹⁷Pani mo vai na matamata na limana vara la toho malum, ale mo

vereulia sohena sava Moli God mo nañihia hin ima řilangi atu. Ale mo vereea mara, “Ha vere la hinau nike isan James peresi na voraiña.” Moiso mo malue mo vano na jara tinapua matea.

¹⁸Na nahonaho rani tamlohi vuro tari na ima řilangi atu la matahu tavera na sava mo masese isan Peter. ¹⁹Supe Herod mo pala isara atu, ale mo alea pani mo sopo hitea, ale mo usi na retusia hai isan la tamlohi vuro atu sei la lo kilaua moiso mo retileu vara nona tamlohi vuro tinapua la lavira la vano la vilimateira. Moiso Herod mo sivo mo hahau roto Judea mo vano Caesarea vara i lo toho atu.

Herod Agrippa Mo Mate

²⁰Supe Herod Agrippa mo lolokoru tavera na mara Tyre peresi Sidon, ale la mai isana na řomřomi matea, ale na rani Blastus patu volitusi non Herod mara mo majinga na řomira moiso, la usia vara la eñi sari tamata peresi Herod matan hara hinau mo lo tai na jaran Supe. ²¹Ale hin rani atu sei Herod mo taua moiso, mo ru na nona ruru peravu mata supe, mo sakele na jara sakele mata supe, ale mo sile na nona retireti isara. ²²Tamlohi la lo ulo lara, “Aaah! Leo god matea nahai, mo sopo leo tamlohi!”

²³Vahatea purongo, angelo matea non Moli mo vilijovia matan mo sopo sile na hasohaso isan God, ale hulesi la hania mo mate.

²⁴Pani reti non God mo ulua mo vano mo vai na tamlohi matuvana tinapua la rasua.

²⁵Barnabas enia Saul lara la vai vevuhi na sava la lo vano matana Jerusalem, la mele hilu matan Antioch la lavi John sei, tapala hijana Mark.

Tanume Tapu Mo Řule Barnabas Enia Saul

13 ¹Harihi enia hija přovet hai peresi na tamlohi vujangi Antioch: Barnabas, Simon la tovia ‘tamlohi viriha’, ale Lucius mara Cyrene, Manaen enia vorain Herod Antipas matea, vaona la korohia, ale Saul. ²Na rani matea la tapuhoro na hanhani ale la pa lo lotu Moli, Tanume Tapu mo vereea mara, “Ha tauhasehi Barnabas enia Saul mata noku voko atu na tovira matana.” ³Hitahu na nora tapuhoro na hanhani peresi na usi, la tau na limara hinira ale la řulera la vano na malelera.

Tiroma Hahau Non Saul

⁴Ale Barnabas enia Saul, Tanume Tapu mo řulera la sivo Seleucia na pahisa tasi, ale la vele na boti hin jara atu, la sivo na Ureuren Cyprus.

⁵Lara la hoso Salamis, la retivujavujangi na reti non God na ima lotu nona Jew. Ale John Mark mo lo usurira sohena nora tuetueni.

⁶Lara la hahau roto ureure atu la kakau Paphos, la tataholo na tamlohi matea mo lo mahumahu na suihan tiapolo, enia Jew přovet haluhalu

matea hijana Bar-Jesus, ⁷enia mo lo toho peresi na tamlohi aulu matan Cyprus sei supe non Rome mo taua atu, hijana Sergius Paulus, enia tamlohi lelevosahi matea. Tamlohi aulu atu mo vahaʻule matan Barnabas enia Saul matan mo opoia vara i rongo na reti non God. ⁸Pani Elymas tamlohi mahumahu atu mo retihorora matan mo sopo opoia vara tamlohi aulu atu i rongo te reti na rasua non Saul enia Barnabas hin Iesu.

⁹Pani Saul sei tapala hijana Paul, Tanume Tapu mo maʻivisia ale Paul mo kilau tataholo isana, ¹⁰ale mara, “Engko natun Tiapolo, ko maʻivi na halu peresi posposi tope na leu, meresahi nona hinau tari sei la ʻrūhu, o pa isoiso na nom vailejejeji na malele varaʻrūhu non Moli pangisa? ¹¹Ale nakerihi natu, liman Moli mo meresahi isam, ale o pa vuso, o pa sopo eʻi hite na mera alo matan te rani makomona.” Vahatea purongo, matana mo nini ale ʻrōroha mo sohonua, ale mo aleale tamlohi vara tea i tauri na limana i tiroma hinia. ¹²Tamlohi aulu atu mara mo hite hinau atu mo masese mo rasua, matan mo maʻurahi tavera na vujangi matan Moli.

Paul Enia Barnabas La Sahe Antioch

¹³Moiso, Paul peresi na tapalana la mele malue Paphos na boti matea la sahe matan Pamphylia. La hoso na taon matan Perga. John Mark mo tinaʻihira atu natu, ale mo mele hilu mo sivo Jerusalem. ¹⁴La mele malue Perga la sahe la pala Antioch matan Pisidia, ale na rani Sabbath la vano la unu na ima lotu nona Jew la sakele. ¹⁵Hitahun na evievi mata Leu non Moses peresi na reti nona pʻrovet, patu tamlohi mata ima lotu mo sohai na retisohai isara mara, “La vorai, vara te nomim retisohai mata tueni na tamlohi, ha sinai ha silea.”

¹⁶Ale Paul mo turu mo tahe na limana vara la tapurongo ale mara, “La tautavu in Israel peresi kamim ka tamlohi ʻrōroha sei ka lo sile na ooloo isan God, ha tapurongo:

¹⁷God nona tautavu in Israel, mo viʻoni na noʻa pua, ale mo vaira la ulua ʻilangi hin rani atu la lo toho Egypt. Ale mo jurira na suihana la malue na mauri slev. ¹⁸God mo lavi na rani ʻilangi isara na jara hasetohu mata tauni ngavulu vati (40). ¹⁹Ale hitahun haratu, mo vaikomokomo na mara jara tinatinapua mo limaravrua Canaan, ale mo sile na nona tamlohi hin jara atu sohena koruna. ²⁰La hinau atu mariviti vara i lavi na tauni mo ngavulu sangavulu vati mo ngavulu lima (450). Hitahuna, mo silera na tamlohi ari mo tikeli na rani non pʻrovet Samuel. ²¹Moiso, tamlohi la tangi matan vara te nora supe, ale God mo silera hin Saul natun Kish, tautavu in Benjamin matea, ale enia mo aulu mata tauni mo ngavulu vati. ²²Pani God mo naʻihia sohena supe, ale mo tau David na jarana. God mo retireti matan David mara, ‘Na hite David natun Jesse vara ʻromina mo usuri na ʻromiku matan enia i pa vai na hinau tari na masaloku.’

1 Sam 13.14

²³Ale mahapin David, Iesu natu, enia haratu sei God mo sohaia usuri na nona retitauhi hinia sohena Jujuri non Israel! ²⁴Hin la rani atu la tiroma na nona pala, John tamlohi paptijo mo lo retivujavujangi na tavitauin Israel vara la vahaŋi na nora hehe, ale la posi mai isan God la paptijo. ²⁵Ale vavahinau non John mariviti vara i lo isoiso, mo vere a vaha visa mara, ‘Ka ŋomi vara enau hare? Enau mo sopo tamlohi atu, pani ha lo levosahia vara haratu mo lo mai hitahu hinau, enau na sopo tataholo vara a uli na asi eve palona.’

²⁶La vorai, kamim sei natun Abraham peresi kamim tari sei ka tamlohi ŋoŋoha sei ka lo sile na oololo isan God non Israel, retisohai matan juri akerihi, mo mai isaŋa mo isoiso. ²⁷Tamlohin Jerusalem peresi na nora tamlohi aulu la maŋivisi na retimangovi hin haratu la sile na talai isan Iesu vara i mate. La sopo hitevosahia vara enia haratu sei pŋovet la lo uliuli matana, hina purongo vara la lo rongo na retireti nona pŋovet tarea na Sabbath. ²⁸La sopo eŋi tapai te malele vara i ori hinia, ale hina purongo hin haratu, la usi Pilate vara i vilimateia.

²⁹Ale lara la maŋivisi vevuhi na retimangovi mata nona mateia, la juria na talopeilopei, la taua na papa matea. ³⁰Pani God mo sauteterahia na mateia! ³¹Ale mo pala vaha visa isan la haratu sei enira tolu la tai Galilee la sahe Jerusalem, enira natu la vere la hinau sei la hitera isana tavitauin Israel.

³²Ale kama lo retivujavujangi kamim hin Retiŋuhu atu matan retitauhi sei God mo vai isana noŋa pua, ³³vara retitauhi atu God mo maŋivisia isaŋa — natura hin haratu mo tahe Iesu sohen David mo ulia na harua psalm mara,

‘Engko Natuku,
nahapani na vujangia
vara enau Tamam.’

Psa 2.7

³⁴Enia hina varaŋuhu matea sei God mo tahe Iesu na mateia matan vara i pa sopo ŋovo, hinau atu mo vere a na Retitapu sei mara,

‘A pa sileho na leŋuhu tapu peresi na retitauhi sei na vaia isan David.’

Isa 55.3

³⁵Matana, mo mele vere a na psalm tinapua matea mara,

‘O pa sopo tinaŋihia vara nom Tamlohi Tapu i hite na ŋovo.’

Psa 16.10

³⁶Matan David, hitahun haratu mo vai na masalon God na nona rani, mo mate ale la tavunia peresi na tahisana, epena mo ŋovo. ³⁷Pani haratu sei God mo lo tahea na mateia, epena i pa sopo hite na ŋovo.

³⁸Matan haratu, la vorai ha levosahia vara hinia, kama lo retivujavujangia vara God i pa ŋomi na hehe, ³⁹ale vara sava tamlohi la tau na nora rasua hinia, la pa tataholo na nahon God, hinau sei Leu non

Moses i sopo efi vaia hin te rani. ⁴⁰Ha lo kilau! Ha sopo tinaihia vara retireti nona p̄rovet la lo vere kamim, matan la vereea lara,

⁴¹‘Ha hitea la tamlohi kerekerehi,

ha maŕurahi tavera hinia ale ha tihai!

Matan na lo vai na vavahinau matea na nomim rani,
vavahinau atu ha sopo efi rasua,

hina purongo vara tea la vereulia isamim.’”

Hab 1.5

⁴²Paul enia Barnabas lara la lo malue na nora ima lotu, tamlohi la usia mo řilangi isara vara la mele vere la hinia atu na tavalu wik na Sabbath.

⁴³Jew matuvana peresi la haratu sei la posi la lavi na rasua nona Jew la lo lotu na ima lotu la usuri Paul enia Barnabas, ale la tupra rua atu la vereea isara vara la turu řilangi usuri na řomřuhu non God.

Paul Mo Vano Isana Tamlohi Řořoha

⁴⁴Sabbath atu mo usuria, mariviti tamlohi tari hin taon tavera atu la sinai vara la rongora la retivujavujangi na reti non Moli. ⁴⁵Pani Jew lara la hitea vao atu, mereimerei mo mařivisira, ale la tapulo vereleji na sava Paul mo lo vereea isara, la lo retisatihia.

⁴⁶Paul enia Barnabas la řomřilangi la řaramira lara, “God mo taua vara kama pa sile na Retiřuhu isana tavgavin Israel tiroma, pani matan ka řohu hinia, ale matan ka hitea vara ka sopo tataholo vara ha lavi na mauri tui, kama pa silea isana tamlohi řořoha. ⁴⁷Matan Moli mo retileu hinia isamam hin haratu mo vereea mara,

‘Enau na vai kamim sohena malarani

isana tamlohi řořoha,

vara ha lavi na reti mata juri i vano na isoiso varama.’”

Isa 49.6

⁴⁸La haratu sei la tamlohi řořoha lara la rongoa, la avulahi hinia ale la hasohaso na reti non Moli, ale la haratu sei God mo viřonira mata mauri tui la rasua. ⁴⁹Ale reti non Moli mo lo unu na jara tari hin jara tavera atu.

⁵⁰Pani tamlohi tavera nona Jew la reve takonahi na hařai aulu sei la lo sile na ooloo isan God peresi na tamlohi aulu matan taon tavera atu, ale la vai na vao matea la meresahi hin Paul enia Barnabas ale la tipahi nařihira hin jara tavera atu. ⁵¹Pani la sařsařhi nařihi na tangotango palora matara ale la vano na taon tavera matan Iconium. ⁵²Ale tamlohi rasua atu la mařivi na avulahi peresi na Tanume Tapu.

Paul Enia Barnabas La Rohi Iconium

14 ¹Na rani Paul enia Barnabas la lo toho Iconium, la unu na ima lotu nona Jew, ale la retivujavujangi peresi na suiha mo vaia vao tavera jea matea isana Jew peresi la haratu la tamlohi řořoha la rasua.

²Pani Jew sei la sopo rasua, la ari posposi la haratu la tamlohi řořoha, ale la komo na řomira la meresahi isan Paul enia Barnabas.

³Mo vaia la toho mo peravu atu, ale la retivujavujangi mo sopo te matahu hinira, ale la vereuli na ñomñuhu non Moli. Ale Moli mo vujangia vara nona retisohai sei mo varañuhu matan mo sile na suiha isana nona vahañule vara la eñi vai na matamata tavera peresi na hinau mañurahi.

⁴Pani tamlohi hin taon tavera atu la patumasa, hai la turu peresi la Jew atu, ale hai la turu peresi la vahañule atu.

⁵Vao matea mata Jew peresi la haratu la tamlohi ñoñoha peresi na nora tamlohi tatavera la hatihia vara la pa vailejlejira, ale la pa parura, ⁶pani Paul enia Barnabas lara la levosahia, la rovo la vano na jara tavera Lycaonia, ale isan la taon tavera atu Lystra enia Derbe peresi na jara ñalihi ea, ⁷ale la retivujavujangi na Retiñuhu ea.

Paul Enia Barnabas La Rohi Lystra Enia Derbe

⁸La pa lo toho atu Lystra la mai tataholo na tamlohi papao matea, mo vora palona la sati ale mo sopo lo hahau na maurina. ⁹Tamlohi atu mo lo tapurongo mo ñuhu na retivujavujangi non Paul, ale Paul mo hitea ale mo hitevosahia vara enia mo rasua vara enia i eñi ñuhu. ¹⁰Ale Paul mo vereia isana na leo tavera matea mara, “O turu!” ale tamlohi atu mo turu tataholo mo tapulo hahau.

¹¹Ale vao atu lara la hite hinau atu Paul mo vaia, la ulo na leon Lycaonia lara, “La tamlohi nike enira god sei la tai na tuka la pala na epe tamlohi!” ¹²La tapulo tovi Barnabas vara Zeus sei god nona mara Greek, ale Paul enia god sei Hermes matan enia mo lo sile na retireti. ¹³Temple non Zeus mo lo toho na jingoima ropen taon tavera atu. Ale nona pñis peresi na vao la lavi na buluk peresi na ñongoñongo la vaira na vira pahai, ale la lavira la vano na mataruan taon tavera atu, ale la tatamahu vara la pa vai na malamalai isan la vahañule atu.

¹⁴Pani Barnabas enia Paul lara la rongovosahi na sava la lo vereia, la ñari na nora ruru ale la maro la vano na livuhan vao atu la lo ulo lara, ¹⁵“La tapala, ka lo vai la hinau sei mata sava? Kamam tamlohi sohemim purongo. Kama mai matan vara kama sile na Retiñuhu isamim matan vara ha pa vahañi na hinau la sopo ñuhu, ale ha posi mai isan God sei mo mauri mo vai na tuka, varama, tasi peresi na hinau tari sei la lo toho hinira. ¹⁶Tuai mo tinañihia vara la haratu la sopo levosahi God na jara tari la eñi usuri na masalora, ¹⁷pani mo vujangia vara enia mo lo mauri na hina ñuhu mo lo vaira sohena usa mo jovi na masapa ale hanhani la ñuhu, ale ka masu na hanhani ka avulahi matana.”

¹⁸Pani hina purongo hin haratu, Paul enia Barnabas mariviti la sopo eñi horo la vao atu vara la sopo vai na malamalai isara.

¹⁹Pani Jew hai la tai Antioch peresi Iconium, la mai la posi na ñomin la vao atu la meresahi hinira, ale la paru Paul ale la reve tahitahia mo malue hin taon tavera atu matan la ñomi vara mo mate. ²⁰Pani tamlohi

rasua lara la lo turu řalihia, Paul mo mele turu ale mo mele unu hin taon tavera atu. Ale na rani tinapua matana, Paul enia Barnabas la malue la vano matan Derbe.

Paul Enia Barnabas La Sivo Antioch Matan Syria

²¹Paul enia Barnabas lara la retivujavujangi na taon tavera matan Derbe la vai na tamlohi usuri matuvana. La mele hilu la sivo Lystra, Iconium ale la mele sahe Antioch matan Pisidia, ²²ale hin la jara atu la tueni na rasua nona tamlohi usuri. La retituetuenira vara la turu řilangi na nora rasua, ale la vere mamahunia isara lara, “Řa pa unu hin mauri atu God mo aulu hinia na malele rani řilangi matuvana.” ²³Paul enia Barnabas la viřoni na patu tamlohi mata kilau na vao kalesia tari, ale na ususi peresi na tapuhoro hanhahi la taura na liman Moli sei la lo tau na nora rasua hinia. ²⁴Moiso la mele sivo roto Pisidia vavano la tikeli Pamphylia. ²⁵Hin jara atu la mele retivujavujangi Perga moiso la sivo Attalia.

²⁶La malue hin jara atu la vele na boti la vano Antioch matan Syria, jara atu sei la lo tapulo na nora hahau ea, jara sei la taura na liman řomřuhu non God ea matan voko sei la isoiso hinia natu. ²⁷Lara la pala, la tovi matavuhi na vao kalesia na jara matea, ale la vereuli vevuhi na sava God mo vaia isara ale sohena sava mo roi na malele mata rasua isan la haratu la tamlohi řořoha. ²⁸Ale la lo toho peresi na tamlohi usuri Antioch mo peravu makomona.

Council Tavera Nona Kalesia Jerusalem

15 ¹Pani tamlohi hai la tai Judea la sinai la tapulo vujangi na kalesia vara, “Vara ha sopo taiřalihi sohen leu non Moses mo vere, ha pa sopo eři juri!” ²Paul enia Barnabas lara la rongoa la sopo avulahi, la vauriuri tavera peresira matana. Ale vao kalesia atu la viřoni Paul enia Barnabas peresi na nora tamlohi hai, vara la sivo Judea matan la sahe Jerusalem vara la sorahia peresi na vahařule tolu na tamlohi tatavera nona vao kalesia Jerusalem. ³Vao kalesia Antioch la řulera la sivo, ale lara la lo sivo la rohi Phoenicia peresi Samaria, ale la sorahia sohena sava la haratu la tamlohi řořoha la posi, ale vorai kalesia hin la jara atu la avulahi tavera matana.

⁴Ale hin rani atu la kakau Jerusalem, kalesia tari, vahařule peresi na vajiahara, la lavi Paul enia Barnabas na avulahi. Ale la vere vevuhi na sava God mo vaia na nora vavahinau. ⁵Pani tamlohi rasua hai sei la tai na vao Pharisee, la turu lara, “Ha vujangi la haratu la tamlohi řořoha vara la pa taiřalihi, ale la pa usuri na leu non Moses.”

⁶Vahařule peresi na vajiahara la pulutahi vara la sorahi hinai sei. ⁷Retireti matuvana la vano moiso, Peter mo turu ale mara, “La vorai, ka

levosahia vara tiroma God mo viřoniau vara a vano a retivujavujangi isan la haratu la tamlohi řořoha, matan vara la eři rongo na retisohai mata Retiřuhu, ale la rasua. ⁸God sei mo levosahi na mapu tamlohi, mo vujangia vara enia mo avulahi hinira, matan enia mo sile na Tanume Tapu isara sohen mo lo silea isařa nike. ⁹Na nahon God, enřa řa sopo tinapua hinira, matan mo vai na mapura la vokevoke na rasua sohena. ¹⁰Ale vara mo sohena, mata sava ka lo vaihite God, matan ka opoia vara ha tau na tetehi puhoni isana tamlohi usuri sei la tamlohi řořoha? Hinau sei, enřa teni nořa pua la sopo eři solotia! ¹¹Pani řa rasua vara God i pa juriřa na řomřuhu non Moli Iesu sohera.”

¹²Ale řomřomi atu mo moti, ale tamlohi tari la tapurongo isan Barnabas enia Paul, la sorahi na matamata tavera peresi na hinau mařurahia sei God mo lo vaira na naho tamlohi la tamlohi řořoha.

¹³La retireti mo isoiso, James mo turu mo vereea mara, “La vorai, ha tapurongo isaku. ¹⁴Ka rongoa Simon Peter mo vereea moiso sohena sava God mo řulea isana tamlohi řořoha vara i lavi nařihi na nona tamlohi isara. ¹⁵Ale reti nona přovet la majinga hin hinau sei sohen la ulia na Retiulia lara,

¹⁶ ‘Hitahun hinau sei a pa mele pala,
ale a pa mele voro na jaran supe David sei mo jovi.
A pa mele voroa hin la sopesopena sei la lo toho,
ale a pa mele turuhia,

¹⁷matan vara tamlohi tinatinapua na varama la pa hite Moli ea,
la haratu sei la tamlohi řořoha sei,
na tovira moiso vara la pa noku.
Harihi enia sava Moli mo vereea.’

Amos 9.11-12

¹⁸Haratu sei mo lo vereuli la hinau nike tuai moiso.

¹⁹Matan haratu, noku kilakilau řa sopo mele sile te rani řilangi tinapua isana tamlohi řořoha sei la lo posi la mai isan God, ²⁰pani mo řuhu vara řa uli te leta hatea mata i vereea isara vara i horora vara la sopo hani na mit sei la silea isana tamasi moiso, ale vara la toho asau na mauri maji, ale vara la sopo hani te maji sei la punia, ale la sopo inu na řae.^b ²¹Matan la leu nike non Moses la retivujavujangira na ima lotu nona Jew na taon tavera tari na Sabbath mata tauni mo visa moiso.”

Leta La Ulia Isana Tamlohi Řořoha

²²Ale vahařule peresi na vajiahara peresi na vao kalesia Jerusalem, la viřoni na tamlohi hai, ale la řulera la sahe Antioch matan Syria peresi

b 15.20 *maji sei la punia:* mo sopo tataholo vara řa hani na maji la punia matan řaena mo pa lo mařivi na visihona.

Paul enia Barnabas, vara la vereuli na řaramin řomřomi atu la lo hahau matana. La tamlohi atu la viřoni na patu tamlohi nona vao kalesia mo rua, Judas sei tapala hijana Barsabbas peresi Silas. ²³Harihi enia leta atu la lo lavia peresira:

“Retioloolo isamim la vorai kalesia Antioch, Syria peresi Cilicia sei ka tamlohi řořoha, mo tai isana vorai kalesia nike Jerusalem, peresi na vahařule peresi na vajiaha sei la aulu na vao kalesia nike.

²⁴Kama levosahia vara tamlohi hai la tai nike la vano isamim ale la vai na řomimim la kaka na nora vujangi, pani kama sopo řulera hin te hinau sohena. ²⁵Ale matana, kama hitea vara mo tataholo vara kama řule la vahařule sei Judas enia Silas peresi la vorai řuhuřuhu sei Paul enia Barnabas isamim usuri na řomřomi kamam tari nike kama hatihia. ²⁶Paul enia Barnabas sei mariviti la mate matan Moli Iesu Křisto. ²⁷Ale matana, kama lo řule Judas enia Silas vara la pa vereuli na sava kama ulia hin leta nike na nahomim.

²⁸Matan kama majinga peresi na Tanume Tapu vara i pa mele řuhu vara kama sopo mele tau te retileu řilangi isamim, pani la retileu nike mo visalete purongo:

²⁹Vara ha sopo hanhani na mit sei la silea isana tamasi moiso, ale vara ha sopo hani te maji sei la punia, ale ha sopo inu na řae, ale vara ha toho asau na mauri maji. Vara ha sopo vai la hinau atu, i pa řuhu jea isamim. Enia natu, enřa vuho.”

³⁰Ale la vahařule tupu vati atu la malue, vahatea la sahe Antioch. La tovi matavuhi na kalesia tari la mai jara matea atu, ale la evi leta atu isara. ³¹Ale avulahi tavera mo jovi isana kalesia tari hin rani atu, lara la rongo retisohai řuhu atu.

³²Ale Judas enia Silas enira tupra rua la přovet, ale la retireti mo peravu isana kalesia vara la tueni na nora rasua vara i ulua i mele řilangi. ³³La lo toho atu mata makomo rani moiso, la řulera la mele sivo Jerusalem peresi na leřuhu nona kalesia isan la haratu sei la lo řulera. ³⁴⁻³⁵Pani Paul enia Barnabas la lo toho Antioch, la lo vujangi, ale la retivujavujangi na reti non Moli peresi na tamlohi tinapua hai.

Paul Enia Barnabas

³⁶Rani hai la vano moiso, ale Paul mo vereia isan Barnabas mara, “Řa mele sahe řa rohi na vorai hin la taon tavera tari sei řa lo retivujavujangi na reti non Moli ea, ale řa hitea vara la lo sohena sava.” ³⁷Barnabas mo avulahi ale mo opoia vara i lavi John Mark. ³⁸Pani Paul mo řohu řilangi, matan John Mark mo rovo hinira tiroma Pamphylia ale mo sopo tuenira na nora vavahinau. ³⁹La sopo eři mai na řomřomi matelete mo vaia Barnabas mo lavi John Mark peresia ale la vele na boti la sahe Cyprus, ⁴⁰pani Paul mo viřoni Silas ale la malue peresi na leřuhu nona vorai

kalesia lamane peresi na hañai. ⁴¹Mo sahe roto Syria peresi Cilicia mo tueni na vao kalesia tari ea vara la turu ñilangi na nora rasua.

Timothy Mo Usuri Paul

16 ¹Paul mo mele sahe mo mai Derbe, ale mo sahe Lystra. Hin jara atu mo tapai na uluvou matea enia tamlohi usuri matea, hijana Timothy, enia natun hañai Jew matea enia kalesia, pani tamana enia mara Greek matea. ²Vorai kalesia Lystra peresi Iconium la vereea vara enia tamlohi ñuhu matea. ³Paul mo opoia vara Timothy i usuria na nora hahau, ale mo lavia mo taiñalihia matan la Jew atu la lo toho hin jara atu la levosahia vara tamana enia mara Greek matea. ⁴Lara la lo vano na taon tavera hatehateahi, la lo vereuli na sava sei vahañule peresi na vajiha sei lo aulu na kalesia Jerusalem, la hatihia vara tamlohi ñoñoha la pa ooloo hinira. ⁵Matana, vao kalesia tari la mele ulua ñilangi na nora rasua, ale evira mo lo sahe aulu na rani hatehateahi.

Tamlohin Macedonia Matea Mo Tovi Paul

⁶Ale la sahe la hahau roto na jara tavera matan Phrygia peresi Galatia, matan Tanume Tapu mo horora vara la sopo sivo Asia mata la vere na retisohai non Moli ea. ⁷Lara la mai Mysia, la vaihitea vara la sahe na jara matan Bithynia, pani Tanumen Iesu mo horora, ⁸ale la mele hahau sivo roto Mysia moiso la sivo Troas.

⁹Hin vutepongi atu hinau matea sohena mavuho matea mo pala isan Paul. Mo hite na mara Macedonia matea mo lo turu atu mo lo usia ñilangi mara, “O mai Macedonia, o tueni kamam!” ¹⁰Paul mara mo hite mavuho atu moiso, kama turu vahatea, ale kama aleale malelemam vara kama vano Macedonia, kama levosahia vara God mo tovi kamam vara kama vano kama retivujavujangi na Retiñuhu isara.

Lydia Mo Rasu Na Retiñuhu

¹¹Ale kama vele na boti Troas kama sahe tataholo Samothrace, ale mo mele rani sahe kama hosu Neapolis, ¹²moiso kama malue atu kama lo sahe Philippi, enia taon tavera matan Macedonia, jara mara Rome matea. Kama toho atu mata makomo rani.

¹³Ale na Sabbath kama malue na mataruan taon tavera atu, kama vano makomona na pahisa wai matea. Kama ñomi vara enia jara matea tamlohi la lo pulutahi mata ususi ea, ale kama sakele hin jara atu ale kama lo sorasora peresi la hañai atu sei la lo pulutahi atu. ¹⁴Vonara matea, hijana Lydia enia mara Thyatira sei, enia taon tavera matea, enia mo lo vai na mania na ruru ñuhu sei perpel, ale matan enia mo lo lotu God, mo lo tapurongo isamam. Ale God mo roi na mapuna vara i rasu na sava Paul mo lo vereea. ¹⁵Ale mo lavi na paptijo peresi na vao imana,

ale hitahuna, mo usia řilangi isamam mara, “Vara na nomim kilakilau ka hitea vara enau na lo turu řilangi hin Moli, ha mai na imaku ale ha lo toho ea.” Ale mo vere a mo řilangi vavano kama majinga isana.

Paul Enia Silas Na Ima Řilangi

¹⁶Kamara kama lo vano na jara mata ususi, kama tapai na hařarihi slev matea sei tanume sasati mata vere na hinau i pa masese mo lo toho hinia. Ale nona tamlohi tavera la lo lavi na mania tavera matana. ¹⁷Mo lo usuri kamam peresi Paul, mo lo ulo aulu mara, “La tamlohi nike enira la volitusi non God sei mo Aulu Jea, enira la lo retivujavujangi kamim na malele mata juri.”

¹⁸Ale mo lo vai hinau atu sohena mata rani matuvana moiso, ale Paul mo malokona, ale mo posi vano isana mo vere a isan tanume sasati atu mara, “Na retileu isam na hijan Iesu Křisto vara o malue hinia.” Ale vahatea purongo mo tinařihia.

¹⁹Pani nona tamlohi tavera lara la hitea vara malele mata nora mania mo pelati, la taurilati Paul enia Silas la reve tahitahira la sivo na jara maket, la vaira la turu na naho tamlohi aulu hin taon atu. ²⁰Lara la lavira la mai la turu na naho tamlohi aria atu, la vere a lara, “La mara Jew nike, la lo vai na řom tamlohi hin taon tavera nike la sopo sakele, ²¹ale la lo vujangi na tamlohi na posposi hai mo sopo tataholo vara enřa mara Rome řa lavira teni vara řa vaira!”

²²Vao atu la tapulo turuleji hinira, ale la tamlohi aria atu la řari nařihhi na ruru non Paul enia Silas, ale la retileu vara la hamajira na maja.

²³Hitahun haratu la hamaji komokomora, la pulahira na lolo ima řilangi, ale la retileu vara tamlohi ima řilangi i lo kilaura vara la sopo mele malue. ²⁴Mara mo lavi retileu atu sohena, mo pulahira sivo na jara matea na lolona vahatea. Ale mo sohoni na palora na koko tapea mo pilatira.

²⁵Na livuha vutepongi, Paul enia Silas la pa lo ususi ale la lo lalavete isan God, ale tamlohi tinapua na lolo ima řilangi, la lo tapurongo hinira.

²⁶Vahatea purongo, mihi tavera matea mo hisu, mo hisuhi ima řilangi atu mo tikeli pulona vahatea, ale vahatea purongo pelati tari la roi, ale jen tari la jovi nařihhi hinira enira mo isoiso. ²⁷Tamlohi kilau na ima řilangi mara mo turu mo hitea vara pelati tari la roi, mo reve nařihhi na nona sita mo tatamahu vara i pa vilia enia hasena, matan mo řomi vara la haratu la lo toho na lolo ima řilangi la rovo moiso. ²⁸Pani Paul mo ulo aulu isana mara, “O sopo vaia! Matan kamam mo isoiso nahai kama lo toho!”

²⁹Tamlohi atu mo ulo mata lamu ale mo maro matan lolon ima řilangi atu vahatea, ale mo jovi na palon Paul enia Silas na nona matahu.

³⁰Moiso mo lavira la malue ale mo usia isara mara, “La tamlohi tavera, a pa vai na sava vara a eři juri hinia?”

³¹La řaramia lara, “O tau na nom rasua hin Moli Iesu, ale o pa juri, engko peresi na vao imam.” ³²Ale la vere na reti non Moli isana peresi

la haratu sei la lo toho peresira na lolo ima. ³³Ale hin vutepongi atu purongo mo lavira la vano mo hoje na matara maja isara, ale enia peresi na vao tari na imana la paptijo vahatea. ³⁴Ale pa tamlohi atu mo lo kilau na ima řilangi mo lavira la sahe na imana, ale mo tau na hanhani na nahora ale mo avulahi tavera peresi na vao imana, matan enira la tau na nora rasua hin God.

³⁵Pani na nahonaho rani, la tamlohi aria atu la řule na nora police vara la vereea isan tamlohi atu mata kilau na ima řilangi lara, “O tinařihira!”

³⁶Pa tamlohi atu mata kilau na ima řilangi, mo vere retireti atu isan Paul mara, “Tamlohi aria, la vahařule vara a tinařihi kamim. Ale matana, ha malue ha vano na tamata.”

³⁷Pani Paul mo vereea isana police atu mara, “La tamlohi atu la hamaji kamam na naho tamlohi, la sopo usuri na posposi tataholo mata ari na tamlohi, hina purongo vara kama mara Rome, ale la pulahi kamam na ima řilangi. Ale nake, la opoia vara la tinařihi kamam tamlohi la sopo levosahia? Mo sopo te malele sohena. Ha vano ha verera hinia vara enira la pa mai nike, ale la nařihi kamam.”

³⁸La police atu la vere la retireti atu isan la tamlohi aria atu. Ale la tamlohi aria atu lara la rongoa vara Paul enia Silas enira mara Rome, la matahu tavera matana. ³⁹Ale la mai la řomtuhutuhu isara. Ale la lavi nařihira la usira řilangi vara la malue hin taon tavera atu. ⁴⁰Lara la malue na ima řilangi, la vano la unu na iman Lydia, ale lara la hite na vorai kalesia atu la retituetuenira moiso la malue.

Paul Enia Silas La Kakau Thessalonica

17 ¹Lara la hahau roto Amphipolis enia Apollonia moiso, la mai Thessalonica sei ima lotu nona Jew matea mo lo toho ea. ²Ale usuri na posin Paul, mo lo matavuhi peresira mata Sabbath mo tolu, ale mo lo vereuli na Retitapu isana tamlohi ea. ³Mo lo vereuli mamahuni na Retitapu na nona vujangi sohena sava Křisto i pa lavi na rongohaji, ale i pa mele turu na mateia, ale mo vereea mara, “Iesu akerihi natu sei na lo retivujavujangia isamim, enia Křisto atu.” ⁴Tatua Jew atu la rasua peresi na vao tavera mara Greek la lo lotu God peresi na hařai aulu matuvana, la avulahi vara la tapala peresi Paul enia Silas.

⁵Pani tamlohi aulu nona Jew la mereimerei hinira, ale la lavi na tamlohi sasati hai hin vao tavera atu na jara maket, ale la vaira la mai vao meresahi matea, ale taon tavera atu mo tapulo roroa na leora. ⁶Ale lara la sopo eři hite Paul enia Silas, la reve tahitahi Jason peresi na vorai kalesia hai, la vaira la turu na naho tamlohi aulu matan taon tavera atu, la ulo lara, “La tamlohi nike sei la lo posileji na varama, enira nahai la pala nike sohen la pete vaia na jara tinapua moiso, ⁷ale Jason mo avulahi hinira mo taura na imana! Enira mo isoiso la lo turuleji na retileu non

supe nona mara Rome matan la lo vere na supe tinapua matea hijana Iesu!”

⁸Ale tamlohi peresi na tamlohi aulu matan taon tavera atu lara la rongo la hinau sei, řomira la sopo sakele. ⁹La tamlohi aulu atu matan taon tavera atu lara la lavi na mania mata volituhu non Jason peresi la vorai kalesia tinapua atu moiso, la tinařihira.

Paul Enia Silas La Kakau Berea

¹⁰Hin vutepongi atu purongo, kalesia la řule Paul enia Silas la malue la vano Berea, ale lara la pala atu, la vano la unu na ima lotu nona Jew. ¹¹Ale Jew matan Berea enira tamlohi ale lelevosahi, la jeu la haratu Thessalonica, matan la lo opoia jea vara la tapurongo hin retisohai atu na rani hatehateahi, ale la lo kilau usuri mamahuni na Retitapu matan vara la hitea vara mo sohena teni mo vono. ¹²Ale matana, vao tavera isara la rasua peresi na mara Greek aulu hai lamane peresi na hařai. ¹³Pani Jew matan Thessalonica lara la rongoa vara Paul mo lo retivujavujangi na retisohai mata reti non God Berea, la mai ea sohena, ale la vai na vao matea matan vara la vai na řomi tamlohi la sati. ¹⁴Ale vahatea purongo la vorai kalesia atu la řule Paul mo sivo na tasi, pani Silas enia Timothy la lo toho atu Berea. ¹⁵La haratu la lo tiroma hin Paul la lavia mo sivo la tikeli Athens, ale Paul mo vere isara mara la vere Silas enia Timothy la sinai isana vila, ale la vorai kalesia atu la malue la sahe matara.

Paul Mo Retivujavujangi Athens

¹⁶Ale na rani Paul mo lo saovira Athens, řomina mo jovi tavera matan mo hite taon tavera atu mo mařivi na tamasi. ¹⁷Ale mo lo vano na ima lotu nona Jew vara i retivujavujangi isara peresi na tamlohi řořoha sei la lo lotu God ea, ale na rani hatehateahi mo lo vujangi na vao tamlohi sei la lo toho na jara maket.

¹⁸Ale Paul mo mele sorasora peresi na tamlohi hai la lo usuri na vujangi non Epicurus peresi hai non Zeno sei la tovira Stoic,^c ale hai la lo usia lara, “Tamlohi rongorongo vono nike mo lo vere na sava nahai?” Tatuara lara, “Vara o tapurongo usuria, o pa hitea sohena vara mo lo vujangi na rasua paro matea.” La pa vere sohena matan Paul mo lo retivujavujangi na Retiřuhu matan Iesu peresi na nona sauteterahi.

¹⁹Ale la lavi Paul la vano na council nora sei hijana Areopagus,^d lara, “O

c 17.18 *Epicurus / Zeno*: Epicurus enia Zeno la vujangi na nora kilakilau mata mauri isana tamlohi. Ale hai la usurira, la haratu la lo usurira la lo vere vara enira la tamlohi lelevosahi. Hija tamlohi usuri non Epicurus enia Epicurean, ale hija tamlohi usuri non Zeno enia Stoic. **d 17.19** *Areopagus*: Council akerihi enia mo lo kilau usuri na vujangi tari la lo unu Athens peresi na tamlohira.

eři vereuli kamam hin vujangi paro akerihi sei ko lo retivujavujangia?
²⁰Matan ko lo vere na hinau paro hai nahai na peromam, ale kama opoia vara kama levosahi na řaramira.” ²¹Mara Athens peresi na tamlohi mara jara tinatinapua sei la lo toho atu, tarea la lo opoia vara la lo sorahi na řomřomi paro sei la pa pala purongo.

²²Ale Paul mo turu na naho vao matan Areopagus atu ale mara:
 “Mara Athens, na hitea vara kamim ka řilangi na sava ka lo rasua,
²³matan nara na lo hahau řalihi, ale na hite na nomim hinahinau mata lotu, ale na mele hite na uliuli matea mo lo toho na votavota vara,

**Isana god matea
 kama sopo levosahia**

Matan haratu a pa retivujavujangi kamim hin God atu sei ka lo lotua pani ka sopo levosahia.

²⁴God atu sei mo vai na varama peresi na hinau tari hinia enia Moli matan na tuka peresi na varama, ale mo sopo toho na ima lotu sei tamlohi la lo vaira na limara, ²⁵teni tamlohi la sopo volitusi isana na limara sohena vara enia mo opoi te hinau isara, pani enia natu mo sile na mauri peresi na maromaro peresi na hinau tari isana tamlohi tari. ²⁶Ale na tamlohi matea mo vai na tamlohi mara jara tinatinapu tari vara la toho na jara tari na varama, mo tau na nora rani ale mo tau na jara sei vara la pa toho ea, ²⁷matan vara la pa ale God, ale la pa tarongo ale vara la tapaia, pani enia mo sopo toho asau hiniřa hatehateahi. ²⁸Matan hinia, enřa řa lo mauri, řa lo vavahinau ale řa lo toho, sohena nomim tamlohi lelevosahi hai la vere moiso lara, ‘Matan enřa sohena enřa taniaia.’

²⁹Ale matan enřa sei řa natun God, řa pa sopo řomřomia vara God enia hinau matea la vaia na gold teni silver teni vatu, teni te niniu tamlohi la vai mamahunia usuri na řomira. ³⁰Matan haratu, hina purongo vara God mo lo kilau purongoi la haratu la lo toho na mauri řořoha, pani nake, mo lo retileu vara tamlohi tari na jara tari vara la pa vahaři na nora hehe, ³¹matan enia mo tau na rani matea moiso vara i pa ari na varama usuri na nona posposi tataholo jea na lima tamlohi matea enia mo viřonia, ale mo vujangia mo memera isana tamlohi tari hin haratu mo sauteterahia na mateia.”

³²Ale lara la rongo na retireti matan sauteterahi atu, hai la tapulo vaivaia. Pani hai lara, “Kama pa mele tapurongo isam matan la hinau akerihi hin te rani.” ³³Ale Paul mo malue na naho tamlohin Areopagus atu. ³⁴Pani tamlohi hai la usuria ale la rasu na sava mo lo verera. Vonara matea hijana Dionysius, enia tamlohi matea hin council tavera atu Areopagus, ale haři matea hijan Damaris, ale mele tamlohi tinapua hai peresira.

Paul Mo Tapai Priscilla Enia Aquila

18 ¹Hitahun haratu, Paul mo malue Athens mo sivo Corinth. ²Ale mo tapala peresi na Jew matea hijana Aquila mara Pontus matea

sei mo pa tai Italy purongo peresi narouna Priscilla, matan Claudius, supe matan Rome, mo retileu vara Jew tari la malue Rome, ³ale matan Paul, enia nona voko mo sohera la lo vai na tent, ale mo lo toho peresira mo lo voko peresira.

⁴Ale na Sabbath hatehateahi, Paul mo lo retivujavujangi isana Jew peresi na mara Greek na nora ima lotu ale mo lo vaihitea vara la levosahia vara Iesu enia hare.

⁵Silas enia Timothy lara la tai Macedonia la pala, Paul mo tau vevuhi na nona rani mata retivujavujangi na reti non God, ale mo lo vereulia isana Jew tarea vara Iesu enia Křisto atu la lo kilau matana. ⁶Pani Jew lara la řohu hinia, ale la verelejleja. Paul mo vai na tovongi matea mo vujangi na nona řohu hinira hin haratu mo sařsařhi nařihi na tangotango na nona ruru ale mara, “Řaemim i pa toho na patumim, mo sopo te noku hinau hinia! Mo tapulo nake, a pa vano isana tamlohi řořoha!”

⁷Moiso, Paul mo malue hin nora ima lotu atu mo vano mo unu na ima matea mo lo toho na pahisan ima lotu atu, enia iman Titius Justus, tamlohi řořoha matea pani enia mo lo lotu God. ⁸Pani Crispus, tamlohi aulu mata ima lotu atu, enia peresi na vao imana sohena la rasu Moli. Mara Corinth tinapua hai sei la rongo hinau atu, la rasua, ale la lavi na paptijo sohera.

⁹Ale Moli mo vujangi Paul na hinau matea sohena mavuho matea hin vutepongi atu, mo vereia isana mara, “O sopo matahu, o retireti, o sopo puni na jingom, ¹⁰matan enau na lo toho peresiho, ale tea i sopo eři tikeli na epem vara i komoho, matan noku tamlohi hin taon tavera nike la mařivi.” ¹¹Matan haratu, Paul mo lo toho atu mata tauni matea vitu mo limarave, mo lo vujangi na reti non God isara.

Paul Mo Turu Na Nahon Gallio

¹²Ale hin rani atu Gallio mo lo aulu hin Achaia, Jew la pulutahi jara matea la vai na vao tavera matea, ale la turuleji hin Paul, la taurilatia la vaia mo turu na naho jara aria vara la aria ¹³lara, “Tamlohi akerihi mo lo vereia isana tamlohi vara la lotu God na malele matea mo sopo usuri na posposi sei leu non Moses mo lo vereia.”

¹⁴Paul mo tatamahu vara i pa retireti pani Gallio mo vereia isan la Jew atu mara, “Vara hinau akerihi enia mata tope na leu matea, teni matan te vařen sasati, i pa tataholo vara a tapurongo isamim Jew matana, ¹⁵pani matan enia mata nomim retireti peresi na hija tamlohi peresi na nomim leu, kamim purongo ha vai tataholoia. A pa sopo ari na hinau sohena.”

¹⁶Ale mo vai na nona tamlohi la sohahi nařihira na nona jara aria. ¹⁷Ale vao atu la taurilati Sosthenes, tamlohi aulu mata ima lotu nona Jew, ale la tapulo tamajia na naho jara aria atu purongo, pani Gallio mo sopo kilaura hinia.

Paul Mo Mele Vano Antioch Matan Syria

¹⁸Paul mo mele toho Corinth mata rani matuvana moiso natu mo vere enŕa vuho isana vorai peresi na vevorai kalesia atu. Ale mo vele na boti matea peresi Priscilla enia Aquila matan vara la vano Syria. Paul mo hiri narīhi na vuluna hin rani atu la pa lo toho Cencreae mata vujangia vara mo vai vevuhi na nona retitauhi. ¹⁹Na rani la pala Ephesus, Paul mo tinaŕihi Priscilla enia Aquila la pa lo toho atu. Ale enia mo sahe mo unu na ima lotu nona Jew, ale mo retivujavujangi isara. ²⁰Mara Ephesus lara la usia vara i toho peravu isara, mo vere isara mara mo vono, ²¹pani mo vere enŕa vuho isara ale mara, “Vara na masalon God, a pa mele mai isamim.” Moiso la mele vele hin boti atu, la malue Ephesus. ²²Ale lara la hoso Caesarea, Paul mo sahe Jerusalem vara i sile na retioloolo isana vao kalesia ea tiroma, moiso mo pa sahe Antioch matan Syria.

²³Mo lo toho atu mata makomo rani, moiso mo mele malue mo sahe mo řalihi na jara matan Galatia enia Phrygia vara i vai na tamlohi usuri hin la jara atu la mele řilangi.

Apollos Mo Tapulo Na Nona Vavahinau

²⁴Hin pongi atu Jew matea hijana Apollos mara Alexandria mo pala Ephesus. Ale enia tamlohi sorasora řuhu matea mo levosahi mamahuni na Retitapu. ²⁵Mo lavi na nona levosahi matan Moli moiso, ale maurina mo lo vujangi na nona avulahi na nona retireti peresi na vujangi tataholo řuhu na hinahina varařuhu hin Moli, pani nona levosahi mo tikeli na paptijo non John purongo. ²⁶Mo tapulo na nona retireti na lolo ima lotu nona Jew mo sopo te matahu hinia. Pani Priscilla enia Aquila lara la rongoa, la tovi řořohia vano hasena, ale la vere tataholoi na malelen God isana.

²⁷Hitahu, Apollos mara mo opoia vara i sivo Achaia, vorai kalesia peresi na vevorai kalesia la retituetuenia vara i vaia. Ale la uli na leta matea isana vorai kalesia Achaia vara la lavia. Mara mo pala isan la haratu la rasua atu, mo tuenira mo tavera usuri na řomřuhu non Moli, ²⁸matan mo vilijovjovi vevuhi na řomřomi nona Jew na naho tamlohi. Ale mo vujangira usuri na Retitapu vara Křisto atu enia Iesu.

Hatolu Hahau Mata Vavahinau Non Paul

19 ¹Ale hin rani atu Apollos mo lo toho Corinth, Paul mo hahau roto na uratan Asia mo pala Ephesus. Ale hin jara atu mo tapai na tamlohi usuri hai, ²ale mo vere isara mara, “Kamim ka lavi na Tanume Tapu hin rani atu ka tapulo rasua, teni mo vono?”

La řaramia lara, “Mo vono, kama sopo lo rongoa vara te Tanume Tapu mo lo toho.”

³Ale Paul mo verea mara, “Vara sohena, kamim ka paptijo na sava?” Lara, “Paptijo atu John mo lo vaia.” ⁴Paul mara, “Paptijo atu John mo lo vaia, enia paptijo mata vahaři na hehe, ale mo lo verea isana tamlohi vara la pa tau na nora rasua hin haratu mo lo mai hitahu hinia, enia mo lo vere Iesu sei.”

⁵Lara la rongo hinau atu, la paptijo na hijan Moli Iesu, ⁶ale Paul mara mo tau na limana hinira, Tanume Tapu mo mai hinira ale la tapulo retireti na leo tinatinapua, ale la lo retimangovi. ⁷Korong, enira tupu sangavulu řomana mo rua.

Vavahinau Non Paul Ephesus

⁸Ale Paul mo unu na ima lotu nona Jew, ale mo retivujavujangi mo sopo te matahu isana mata vitu mo tolu. Mo vere mamahunia vara mauri atu God mo aulu hinia mo sohena sava, ale mo vaira la hitevosahi na nona vujangi matan mauri atu. ⁹Pani tatuara la lo turu řilangi na řomira hasera, ale la řohu vara la rasu. La verelejeleji rasua atu na naho tamlohi. Ale Paul mo malue mo lavi la tamlohi usuri atu peresia. Na rani hatehateahi la lo pulutahi na ima matavuhi matan Tyrannus, ale mo lo retivujavujangira ea. ¹⁰Paul mo vaia sohena mata tauni mo rua matan haratu tamlohi tari sei la lo toho Asia, Jew peresi na tamlohi řořoha, la rongo na reti non Moli.

La Natun Sceva Atu Mo Limaravrua

¹¹God mo lo vai na matamata tavera tinatinapua na liman Paul. ¹²Ale matana, hina purongo vara te ruru kamoti teni ruru mata voko purongo la tia na huřin Paul, ale vara la lavira la vano isana tamlohi rojoa, mo vai na nora rojoa la tihai, ale tanume sasati la malue hinira.

¹³Ale pani Jew hai sohena, la lo titiu nařihi na tanume sasati na taon la lo vano hinira, pani la vaihitea vara la vaia na hijan Moli Iesu isan la haratu sei tanume sasati la lo toho hinira, ale la vere sohen harihi lara, “Na lo retileu řilangi isam na hijan Iesu sei Paul mo lo retivujavujangia vara o malue!” ¹⁴Vorai mo limaravrua la natun Jew matea hijana Sceva, enia mo lo hase vere vara enia přis aulu matea, enira natu la lo vai la hinau nike. ¹⁵Pani lara la vaia, tanume sasati matea mo řaramira mara, “Na levosahi Iesu, ale na levosahi Paul makomona, pani kamim sava tamlohi hin kamim?” ¹⁶Pa tamlohi atu sei tanume sasati mo lo toho hinia mo kue matara mo hamajira vavano la levosahi, ale la hitea sohena la sopo eři mele vai te hinau, la turu la maro la rovo malamala, pani la loso na řaera la vano.

¹⁷Jew tari peresi na tamlohi řořoha tari Ephesus la rongo sorasora akerihi, ale mo vaira la matahu enira mo isoiso. Ale hijan Moli Iesu mo lavi na hasohaso tavera matana. ¹⁸Matuvana hin la haratu sei la rasu

Iesu, la sinai la turu nahonaho, la taviti na sava hehe la vaira. ¹⁹Vao tavera sei la lo mahumahu, la lavi na nora puku mata mahumahu la takonahira jara matea, ale la sulira na naho tamlohi tari. Lara la evi na volin la puku atu hatehateahi, evira mo isoiso mo tataholo na volvoli mata voko mata rani mo tari vaha ngavulu lima (50,000). ²⁰Matan haratu, retisohai hin Moli mo ulua, ale suihana mo posi na mauri tamlohi matuvana.

Tamlohi Lotulotu Vono La Mai Jara Matea

²¹Hitahun la hinau atu, Paul mo tau na řomina vara i sivo Jerusalem, ale vara i hahau roto Macedonia enia Achai. Mo vereea mara, “Vara na sivo atu moiso, na opoia vara a vano a hite Rome.” ²²Mo řule na nona tamlohi tuetueni mo rua, Timothy enia Erastus la vano Macedonia, pani enia mo mele toho atu Asia mata makomo rani.

²³Hin la rani atu patumasa tavera matea Ephesus mo pala mata rasua hin Iesu. ²⁴Mo tapulo na tamlohi matea hijana Demetrius, enia tamlohi matea mo lo vai na tamasi varihi mata nora Temple sei la tovia Artemis na silver. Ale enia peresi la haratu la lo vaira, la lo vai na mania tavera matana. ²⁵Mo tovi matavuhi la tamlohi atu peresi la haratu la lo vavahinau na hinau mariviti i sohera, ale mara, “La tapala, ka levosahia vara nořa mauri tavitavi mo lo mai na nořa vavahinau. ²⁶Ale ka hitea ale ka rongoa vara Paul akerihi natu, mo lo vai na tamlohi vao tavera la lo rasua, ale nake la lo vahaři hin nořa god Artemis, matan mo lo vereea isara mara god sei tamlohi la lo vaira na limara purongo, la sopo god varařuhu, ale mo sopo vujangia nike Ephesus purongo, pani na jara tari Asia sei mo lo vano ea. ²⁷I pa sopo sati purongo na nořa vavahinau mata tavitav, pani matan tamlohi la pa řomřomi purongo na temple non god hařai aulu sei Artemis, enia peresi na tamlohi na jara tari Asia peresi na varama sei la lo lotua, la pa rongo i sati matan hijana mo jovi.”

²⁸Lara la rongoa la lolokoru patura, ale la tapulo ngara lara, “Artemis nona mara Ephesus enia mo aulu jea!” ²⁹Taon tavera atu mo mařivi na uloulo, ale vao tavera atu la maro la vano na nora jara tavera mata matavuhi, la lo reve tahitahi Gaius enia Aristarchus, tamlohi mo rua mara Macedonia sei la lo usuri Paul na nona hahau. ³⁰Pani Paul mara mo opoia vara i unu hin jara matavuhi tavera atu, tamlohi usuri la hora. ³¹Mo sopo enira purongo pani tapalan Paul hai sohena, enira tamlohi aulu matan jara atu Asia, ale la sohai na retisohai matea isana la usia řilangi vara i sopo unu hin jara matavuhi atu.

³²Hin matavuhi atu, tamlohi hai la lo ngara mata hinau matea, hai la ngara na hinau tinapua matan matavuhi atu mo vaore hajavua, ale matuvana la sopo levosahia vara la lo matavuhi mata sava. ³³Tatuara hin vao atu la řomřomia vara enia matan Alexander, matan Jew hai la sohaia

mo sahe na nahon matavuhi atu. Ale Alexander mo lo tahe na limana matan mo opoia vara i vere mamahunia na nahon vao atu, vara hinau nike Jew la sopo vaia. ³⁴Pani vao atu lara la hitea vara enia Jew matea, la mele tapulo uloulo, ale la taurilati uloulo atu mata aoa mo rua lara, “Artemis nona mara Ephesus enia mo aulu jea!”

³⁵Ale hitahun haratu, tamlohi tavera matan taon atu mara mo vaira la toho malum mo vere mara, “Mara Ephesus, sava tamlohi natu mo sopo levosahia vara taon matan Ephesus mo lo kilau mamahuni na temple non Artemis aulu peresi na vatuna sei mo jovi na tuka? ³⁶Matan la hinau atu tea i sopo eñi halu hinira, mo řuhu jea vara ha toho malum ha sopo rongorongono vono! ³⁷Matan ka lavi la tamlohi nike la sinai nike, la sopo tamlohi mata vavanaho na temple teni la lo retisatihi nořa god hařai. ³⁸Ale, vara Demetrius peresi la haratu la lo vai voko akerihi, la rongo mo satı matan tea, ima aria mo lo roi, ale tamlohi aria la lo toho purongo, mo řuhu vara la usuri na malele leu ea. ³⁹Pani vara ka mele opoi te hinau aulu hinia, ha pa vai tataholoia na nořa matavuhi tavera hitahu. ⁴⁰Matan vara i vono, tamlohi tavera matan Rome, la pa sile na talai isan matavuhi tavera nike matan mo vaore hajavua, ale mo sopo te retireti řuhu tea i eñi vere matan matavuhi nike.” ⁴¹Mara mo vere la hinau atu mo isoiso, mo řulera la mule.

Paul Mo Mele Vano Macedonia Peresi Greece

20 ¹Matavuhi tavera atu mara mo isoiso, Paul mo tovi na tamlohi usuri la mai jara matea. Ale mo retituetuenira moiso mo vere enřa vuho isara ale mo malue mo vano Macedonia. ²Na nona hahau mo lo vano mo retituetueni na kalesia na taon hatehateahi na malelena vavano mo pala Greece. ³Mo lo toho vitu mo tolu atu, ale Paul mo tatamahu vara i vele na boti matea i sivo Syria, pani matan mo rongoa vara Jew la hatihi moiso vara la pa vai te hinau isana, mo posi na řomina ale mo mele sahe mo hahau roto Macedonia.

⁴Tamlohi hai la lo usuri Paul sohen: Sopater mara Berea natun Pyrrhus; Aristarchus enia Secundus mara Thessalonica, Gaius mara Derbe; Timothy, Tychicus enia Trophimus matan Asia. ⁵La tamlohi nike la vano Troas tiroma vara la lo saovi kamam ea. ⁶Rani mata Passover la vano moiso, kama vele na boti matea Philippi, ale kama maro na tasi mata rani mo lima moiso, ale kama pa hoso isara Troas. Kama lo toho atu mata rani mo limaravrua.

Paul Mo Mele Vano Troas

⁷Na Sunday, kamara kama pulutahi jara matea mata hanhani non Moli, Paul mo tapulo vujangi na tamlohi, pani matan mo tau na řomina moiso vara i mele rani sahe i pa malue, mo vujangira vavano mo livuha

vutepongi. ⁸Kama lo sakele na jara matea mo aulu makomona na lolon ima atu kama lo toho hinia, ale lamu matuvana la lo hani hin jara atu, ⁹ale uluvou matea hijana Eutychus mo lo sakele na windoa matea, ale mo lo tapulo juruvi řomalihō, matan Paul mo retireti mo peravu. Ale mara mo juruvi řomalihō hin jara atu sei mo aulu sohena ima mo tolu, mo jovi sivo na lepa mo mate. ¹⁰Pani Paul mo sivo isana mo rautoho, ale mo tapea na limana ale mara, “Ha sopo matahu, mo lo mauri.” ¹¹Moiso Paul mo mele vele sahe aulu hin jara atu, ale mara mo tope na pereti ale la hania moiso, mo mele tapulo retireti peresira vavano mo rani, moiso mo malue isara. ¹²Ale la lavi uluvou atu mo mule, ale la avulahi tavera matan mo lo řuhu purongo.

Patu Tamlohi Kalesia Matan Ephesus

¹³Kama vano tiroma na boti ale kama malue kama sivo Assos, matan vara kama pa tapai Paul ea, matan enia mo verea mara i pa hahau purongo i sivo atu, ale kama pa lingia atu. ¹⁴Kamara kama tapai Paul Assos, mo vele na boti kama sivo Mitylene. ¹⁵Kama malue atu ale mo mele rani sahe kama tikeli Chios, mo mele rani sahe kama pala Samos, ale mo mele rani sahe, kama tikeli Miletus.

¹⁶Matan Paul mo opoia vara i jeu Ephesus matan vara i sopo mele toho matan te rani atu Asia matan mo lo vaivila vara i sivo Jerusalem tiroma moiso i pa rani mata Pentecost. ¹⁷Kama hosō Miletus ale Paul mo sohai na retisohai matea isana patu tamlohi mata vao kalesia Ephesus vara la sinai la tapaia atu.

¹⁸Lara la pala mo vere isara mara, “Kamim ka levosahi na mauriku hin rani atu na lo toho peresi kamim mo tapulo hin rani atu na tau na paloku Asia. ¹⁹Na volitusi non Moli na posposi řomatano peresi na tangi ale peresi na rani řilangi sei la mai isaku na sava Jew la hatihia matakū. ²⁰Pani ka levosahi mamahunia vara hin la rani atu na sopo turu juha na noku retivujavujangi isamim matan te hinau sei vara i eři tueni kamim hinia. Ale na sopo turu juha hin te hinau na noku vujangi isamim na naho vao tamlohi teni na lolo ima hatehateahi, ²¹ale na lo retivuhesi isana Jew peresi na tamlohi řořoħa mata vahaři na hehe la mai isan God na rasua hin nořa Moli Iesu.

²²Ale nakerihi, Tanume Tapu mo lo sohaiau vara a sivo Jerusalem, ale na sopo levosahi na sava i pa masese isaku atu, ²³pani Tanume Tapu mo pete retiřoãroãhãhãhã hinia moiso na taon tari sei na lo vano ea vara ima řilangi peresi na noku tipahi la lo saoviau ea. ²⁴Pani mauriku i pa sopo řuhu matan te hinau isaku vara a sopo vai vevuhi na sava Moli Iesu mo taua na limaku, enia vavahinau sei mata vereuli na Retiřuhu mata řomřuhu non God.

²⁵Ale nakerihi na lo vere tataholoia kamim hinia vara i pa sopo te vonamim hatea sei na lo hahau řalihia na lo retivujavujangi mauri atu God

mo aulu hinia isana, i pa mele hiteau. ²⁶Matan haratu, na lo vereea vara mo sopo te noku hinau hinia na řaemim. ²⁷Matan na sopo turu juha vara a sopo vereuli kamim na řomřomi tavera tari non God.

²⁸Ha hase kilau mamahuni kamim peresi na vao kalesia sei Tanume Tapu mo vai kamim ka aulu hinira, vara ha tiroma na vao kalesia non God sei mo volira na řaena. ²⁹Na levosahia, vara a malue isamim, tamlohi sasati sohena viriu jala la pa mai isamim, la pa komo na vao kalesia, ale la sopo eři řomřomira. ³⁰Mo sopo haratu purongo pani na lolomim tataholo te tamlohi la pa turu la vujangileji na retivarařuhu matan vara la pa lavi te nora tamlohi usuri isamim. ³¹Matan haratu, ha pa sopo peka, ha lo řomřomia vara, mata tauni mo tolu, tarea na lo retiřoaoahai kamim hatehateahi peresi na wai matakau.

³²Ale nakerihi, na lo tau kamim na liman God matan vara ha pa sile na retisohai mata nona řomřuhu. Retisohai nike i eři tueni kamim vara ha řilangi, ale i sile kamim na koruna peresi la haratu sei God mo tapuhira.

³³Ka levosahi mamahunia vara na sopo usi tea hin te silver, gold teni ruru. ³⁴Kamim ka levosahi mamahunia vara enau peresi la haratu sei la toho peresiau, kama lo hanhani na masumasuku purongo. ³⁵Na noku tovongi na lo vujangi kamim hinia vara, vara ha lo vavahinau ha pa tueni la haratu la sopo řilangi, ale ha řomřomi na reti non Moli Iesu sei enia hasena mo vereea mara, ‘Avulahi tavera i pa vano isan haratu sei mo lo silea mo jeu haratu mo lavia.’ ”

³⁶Mara mo vere la hinau atu moiso, mo papaohi sivo atano peresira ale mo usi. ³⁷Enira mo isoiso la tapulo tangi aulu, la raho Paul ale la pungosia, ³⁸řomira mo pa sati jea matan mo vereea mara la pa sopo eři mele hitea, moiso la usuria la sivo vara la taua na boti.

Paul Mo Sivo Jerusalem

21 ¹Kamara kama tinařihira, kama malue vano na tasi, ale kama sivo tataholo na ureuren Cos, ale mo mele rani sahe kama pala Rhodes, ale kama malue atu kama hosu Patara. ²Hin jara atu kama tapai na boti matea, mo tatamahu vara i sivo Phoenicia, kama vele hinia ale kama malue vano na tasi. ³Kama kilau vano na ureuren Cyprus mo lo sale vara i tihai na maraumam, ale kama lo sivo Syria, ale kama hosu Tyre matan boti atu i pa tinařihi na nona lavlavi atu. ⁴Ale kama ale na tamlohi usuri hin jara atu ale kama hitera, kama lo toho peresira mata rani mo limaravrua. La lo řarea isan Paul lara Tanume Tapu mo vereea isara vara i sopo tau na palona Jerusalem. ⁵Mo turu tetelehi na rani vara kama pa malue na boti, enira mo isoiso peresi na naroura, na natura, la usuri kamam kama malue hin taon tavera atu, ale kamara kama papaohi na oneone kama usi moiso, ⁶kama vere enřa vuho isara hatehateahi moiso kama vele hin pa boti, ale enira la mele mule.

⁷Kama mele tapulo na nomam hahau atu Tyre kama sivo kama hoso Ptolemais, ale kamara kama tulahi na vorai kalesia peresi na vevorai kalesia atu moiso, kama lo toho peresira mata rani matea. ⁸Mo mele rani sahe, kama malue kama sivo kama hoso Caesarea, ale kama unu na iman Philip. Enia evangelist matea, enia deacon matea hin la haratu mo limaravrua, ale kama lo toho peresia. ⁹Venatuna mo vati la sopo lo lahi, ale la lo retimangovi.

¹⁰Kama lo toho atu mata rani mo visa moiso, p̄ovet matea hijana Agabus mo tai Judea mo sinai. ¹¹Mo mai isamam, mo lavi na otin Paul, mo liho na limana peresi na palona hinia ale mara, “Tanume Tapu mo vere mara, ‘Hin malele akerihi nату, Jew matan Jerusalem la pa liho tamlohi atu sei otina nakerihi, ale la pa taua na lima tamlohi řořoha.’” ¹²Kamam peresi la haratu la lo toho atu, kama rongo hinau atu sohena, kama vere řilangi isan Paul vara i sopo sahe Jerusalem.

¹³Moiso Paul mo vere mara, “Ka lo vai na sava nahai? Matan nomim tangi mo lo vaiau na lo rongo mo sati! Matan enau na tatamahu moiso vara la pa lihoau, ale vara a mate Jerusalem mata hijan Moli Iesu.”

¹⁴Ale matan kama sopo eři horoa, kama sopo mele vere te hinau pani kamara, “Řa pa usuri na masolon Moli purongo.”

Paul Mo Kakau Jerusalem

¹⁵Hitahun la rani atu, kama tatamahu, ale kama sahe Jerusalem. ¹⁶Tamlohi usuri mara Caesarea hai la usuri kamam, ale la lavi kamam la tau kamam na iman Mnason mara Cyprus, enia mo mai tamlohi usuri tuai moiso. ¹⁷Hin rani atu kama pala Jerusalem, vorai peresi na vevorai kalesia la lavi kamam na avulahi taverna.

¹⁸Mo mele rani sahe, Paul mo usuri kamam kama vano vara kama hite James peresi na vajiaha aulu na vao kalesia atu sei la lo toho atu. ¹⁹Ale Paul mara mo sile na retioloole isara moiso, mo tapulo vereuli mamahuni na hinau tari God mo vaia isana tamlohi řořoha na nona vavahinau. ²⁰Lara la rongoa la hasohaso God moiso, la vere isana lara, “Ko levosahia vorai vara Jew mo tari vaha visa moiso la tau na nora rasu hin Iesu pani la pa lo turu řilangi na leu non Moses. ²¹Ale la rongoa moiso vara ko lo vere isana Jew tari sei la lo toho na jara tamlohi řořoha vara la sopo mele usuri na leu non Moses, ale ko vere isara vara la sopo taiřalihi na natura teni vara la sopo usuri na posiřa matan tuai. ²²Vara mo sohena, řa pa eři vai na sava? La pa levosahia vara ko pala nike moiso.

²³Ale matana, o pa vai na sava kama pa vere isam nakerihi: nomam tamlohi tupu vati nahai, la vai na retitauhi isan God moiso matan vara la pa hiri pilopilo, ²⁴o lavira o vano peresira, o hase onehiho usuri na leu non Moses peresira, ale o voli na nora silesilea matan vara enira la

eři hiri pilopilo. Moiso tamlohi tari la pa levosahia natu vara sava la lo rongoa matam enira hina purongo matan engko ko lo hahau usuri na leu.

²⁵Pani isana tamlohi řořoha sei la rasua, kama pete sohai na leta moiso peresi na nomam řomřomi vara la sopo hani na mit sei la silea isana tamasi moiso, ale la sopo inu na řae, ale vara la sopo hani te maji sei la punia, ale vara la toho asau na mauri maji.”

La Taurilati Paul

²⁶Moiso mo mele rani sahe, Paul mo lavi la tamlohi atu, ale enia mo hase vaia mo vokevoke peresira, moiso mo vano na Temple mo vereuli na isoiso rani mata nora retitauhi mata vokevoke isana přis vara la pa sile na malamalai matara hatehateahi.

²⁷La rani mo limaravrua atu mariviti vara la isoiso, Jew hai matan Asia la hite Paul na lolo rope Temple. La halu na vao matea matan vara la pa taurilati Paul. ²⁸La lo uloulo lara, “Tavtavuin Israel! Ha tueni kamam! Tamlohi nike natu mo lo vujangi na tamlohi tari na jara tari vara la řohu na nořa tamlohi, nořa leu ale jara tapu nike! Aulu hin haratu, mo lavi na tamlohi řořoha hai la unu na lolo rope Temple, ale mo vai jara tapu nike mo lumiha!” ²⁹Matan hin rani atu purongo la hite Trophimus, mara Ephesus matea, mo lo toho peresi Paul Jerusalem, ale la lo řomřomia vara mo lavia mo unu na lolo rope Temple.

³⁰Ale tamlohi tari hin taon tavera atu la sopo mele sakele malum, ale tamlohi la maro jara matea, la tauri Paul ale la reve tahitahia mo malue na lolo Temple, ale vahatea purongo mataruana la pelati. ³¹Ale la pa lo vaihitea vara la vilimateia. Pani retisohai matea mo tikeli na commander nona tamlohi vuro non Rome vara tamlohi tari la lo vai na vaore rongorongono vono Jerusalem. ³²Vahatea purongo commander atu mo lavi na tamlohi vuro peresi na captain la maro la sivo hin vao atu. Ale vao atu lara la hite commander atu mo mai peresi la tamlohi vuro atu, la sopo mele tamaji Paul.

³³Moiso pa commander atu mo sinai mo taurilatia, ale mo retileu vara la lihoa na jen mo rua, moiso mo usia vara enia hare ale vara mo vai na sava mo sati. ³⁴Pani hai hin vao atu la lo ulo na hinau matea, hai la lo ulo na hinau tinapua, ale pa commander atu mara mo levosahia vara i pa sopo eři lavuti na retivarařuhu matan vaore atu, mo retileu vara la lavi Paul i unu na patu ima mata vuro Jerusalem. ³⁵Ale lara la mai na jara sevsevuti hin patu ima mata vuro atu, tamlohi vuro la tauri Paul aulu na pilira matan vao atu la lo vaihitea mo řilangi jea vara la vilimateia, ³⁶matan vao tamlohi atu la lo usuria la lo ngara lara, “Ha vilimateia!”

Paul Mo Retireti Isan Vao Tavera Atu

³⁷Ale lara la pa lo lavi Paul mo lo unu hin patu ima mata vuro atu, Paul mo vereea isan commander atu mara, “A eři vere na hinau matea isam?”

Commander atu mo hutua, mo řaramia mara, “Avei, engko ko levosahi na leo mara Greek? ³⁸Engko mo sopo pa mara Egypt atu sei mo lo tiroma na vao mata valum naturihi, ale sei mo tiroma na tamlohi mata vili na tamlohi mo tari vaha vati (4,000) la vano na jara tano koru?”

³⁹Paul mo řaramia mara, “Mo vono! Enau Jew matea mara Tarsus hin Cilicia, enau matan taon aulu atu! O eři tinařihia vara a retireti isan la tamlohi nike?”

⁴⁰Commander atu mara mo tinařihia, Paul mo turu hin jara sevsevuti atu, ale mo tahe na limana isan vao atu, ale lara la toho malum, mo retireti isara na leon tavgavu in Israel.

Paul Mo Tapulo Retireti

22 ¹Ale Paul mara, “La vorai peresi na vajiaha, ha tapurongo na sava a pa vereea mata noku vavahinau.”

²Lara la rongoa vara mo lo retireti isara na leon tavgavu in Israel, la mele toho malum jea, ale mo vereea mara, ³“Enau Jew matea, na vora Tarsus hin Cilicia, pani na ulua hin taon tavera nike, na lavi na noku lelevosahi isan Gamaliel usuri na posposi tataholo mata leu nona nořa pua, ale na lo řilangi hin God sohen kamim nahapani. ⁴Na lo tipahi na tamlohi hin rasua sei, hai la mate na noku vavahinau, na liho na lamane peresi na hařai na taura na ima řilangi, ⁵sohen přis aulu peresi na tamlohi tari mata council la eři vereea matakū. Na lavi na leta isara matan vara a lavia i vano isana voraiřa Jew, Damascus. Ale na pa lo vano na maleleku matan vara a taurilatira ale a tiroma hinira la mai Jerusalem vara la lavi na talai nike, ⁶ale na pa lo vano mariviti Damascus, korong alo mo posi moiso, ale vahatea purongo, memera tavera matea mo sasari řalihiau. ⁷Ale na jovi sivo na lepa na rongo na leo matea mo vereea isaku mara, ‘Saul, Saul, mata sava ko lo tipahiau?’

⁸Ale na řaramia nara, ‘Tamlohi tavera, engko hare?’

Ale mo vereea isaku mara, ‘Enau Iesu pa mara Nazareth atu sei ko lo tipahia!’ ⁹La haratu la lo toho peresiau la hite memera atu, pani la sopo rongovosahi na leon haratu mo lo retireti isaku.

¹⁰Ale na usia nara, ‘A pa vai na sava Moli?’

Ale Moli mo vereea isaku mara, ‘O turu o vano Damascus, hin jara atu la pa vereho na hinau tari sei na viřoniho vara o pa vaira.’ ¹¹Ale matan na sopo mele eři kilau matan memera tavera atu, la haratu la lo toho peresiau la tiroma hiniau na vano Damascus.

¹²Tamlohi matea hijana Ananias, mo lo lotu God tarea usuri na leu, ale Jew Damascus la vereea vara enia tamlohi řuhu matea, ¹³mo mai isaku, mo turu na pahisaku ale mo vereea isaku mara, ‘Vorai Saul, o mele kilau!’ Ale vahatea purongo na kilau sahe na hitea.

¹⁴Moiso mo vereea mara, ‘God nona nořa pua mo viřoniho moiso, vara o pa levosahi na masalona vara o pa hite haratu mo Tataholo Jea, ale vara

o pa eĩ rongo na retileu matea na jingona, ¹⁵matan engko, o pa nona tuetueni isana tamlohi tari na sava ko hitea ale sava ko rongoa. ¹⁶Ale nakerihi, ko lo saovi na sava? O turu, o lavi na paptijo, ale God i pa hoje naĩhi na nom hehe, o tau na nom rasua na hijan Moli.'

¹⁷Na rani na mele mai Jerusalem, ale na lo ususi na lolo Temple, na hite na hinau matea sohena mavuho matea, ¹⁸ale na hite Moli mo lo vereea isaku mara, 'O vila, o malue Jerusalem vila matan la pa sopo eĩ lavi na nom vereulia matakū.'

¹⁹Na vereea isana nara, 'Pani Moli, enira hasera la eĩ vereea vara enau natu, na lo tau la haratu la rasuho na ima řilangi, ale na lo hamajira na ima lotu nona Jew tari. ²⁰Ale na rani nom tuetueni Stephen mo mate, na lo turu atu na majinga hinia, ale na lo kilau mamahuni na ruru non la haratu la lo vilia.'

²¹Ale mo vereea isaku mara, 'O malue Jerusalem, matan a pa řuleho o vano asau řove isana tamlohi řořoha!' "

La Ari Paul Na Lolo Patu Ima Mata Vuro

²²Vao atu la lo tapurongo hinia mo tikeli reti sei Paul mo vereea mara, 'La haratu la tamlohi řořoha.' Ale la ngaruhia lara, "Ha vilimateia! Mo sopo tataholo vara i lo mauri!" ²³La ngara ngara, ale la lo lanaĩhi na nora ruru peravu, ale la lo pulahi na tangotango aulu na masapa, ²⁴ale pa commander atu mo retileu vara la lavia i unu hin patu ima mata vuro atu. Mo vere na nona tamlohi vara la pa rupia na asi maja mata lavi na řarami nona retiusia, matan mo opoia vara i levosahia vara vao atu mo lo ngarahia mata sava.

Paul Enia Mara Rome Matea

²⁵Lara la řirahi Paul na jara mata tamaji na tamlohi moiso, Paul mo vereea isana captain mata tamlohi vuro matea mo lo turu na pahisana mara, "Mo tataholo vara ha rupi na mara Rome matea na asi maja matea, pani ka sopo lo aria?"

²⁶Pa captain atu mara mo rongoa sohena, mo vano isan nona commander, ale mo vereea isana mara, "Ko levosahi na sava ko lo tatamahu vara o vaia? Matan tamlohi nike enia mara Rome matea!"

²⁷Pa commander atu mo mai mo usia isan Paul mara, "O to vereea isaku, varařuhu vara engko mara Rome matea?"

Ale Paul mo řaramia mara, "He'e."

²⁸Ale commander atu mo řaramia mara, "Enau na jalahi na mania tavera matan vara a eĩ mai mara Rome matea."

Paul mara, "Pani enau, na vora mara Rome matea."

²⁹Ale la haratu sei la lo tatamahu vara la pa rupia na asi maja, la turu juha hinia vahatea. Pa patu tamlohi vuro aulu atu mo matahu matan mo

levosahia vara Paul enia mara Rome tataholo matea, ale enia natu mo vereea vara la lihoa.

³⁰Mo mele rani sahe, ale matan pa patu tamlohi vuro aulu atu mo opoia vara i levosahia i ŕuhu vara Jew la lo tuvai Paul mata sava, mo uli naŕihia ale mo retileu vara moli nona pŕis peresi na tamlohi tari mata council matan Jerusalem la mai jara matea. Ale mo lavi Paul ale mo vaia mo turu na nahora.

Paul Mo Turu Na Naho Council Jerusalem

23 ¹Ale Paul mo kilau tataholo isana tamlohi hin council atu, ale mara, “La vorai, na mauriku na nahon God mo tikeli nake, ŕomiku mo sopo kaka hin te hinau.”

²Ananias pŕis aulu mara mo rongoa, mo vereea mara la haratu la lo turu na pahisana la vojahia na jingona. ³Ale Paul mo vereea isana mara, “God i pa vojahiho, ko tapnetano! Ko sakele atu vara o ariau usuri na leu, moiso ko lo tope na leu na nom retileu vara la vojahiau.”

⁴La haratu la lo turu mariviti la vereea lara, “Ko ŕom vara mo tataholo vara o reti isan pŕis aulu non God sohen haratu?”

⁵Ale Paul mara, “La vorai, na sopo lo levosahia vara enia pŕis aulu. Matan na levosahia vara Retiulia mo vereea vara, ‘Ha sopo veresati na nomim tamlohi aulu’.” *Exo 22.28*

⁶Moiso, Paul mo hitea vara sopen vao atu enia Sadducee, ale sopera enira Pharisee, ale mo ulo aulu isana tamlohin council atu mara, “La vorai, enau Pharisee matea, enau natu Pharisee. Na lo turu na aria matan na lo ŕomtoho na sauteterahi!”

⁷Mara mo vereea sohena, vasvas matea mo malue isana Pharisee peresi na Sadducee ale vao atu la patumasa. ⁸Matan Sadducee la vereea vara mo sopo te sauteterahi, teni te angelo teni te tanume, pani Pharisee la rasu la hinau sei. ⁹Ale vao atu la vaore tavera, tamlohi vujangi mata leu na vao Pharisee la turu ale la vereea mo ŕilangi lara, “Kama sopo hite te hinau i sati isan tamlohi nike. I pa sohena sava vara te tanume ŕuhu teni te angelo mo lo retireti isana?” ¹⁰Ale commander atu mara mo hitea, mo matahu vara la pa ŕariŕari Paul, ale mo retileu vara nona tamlohi vuro la sivo la lavi naŕihia na nora suiha, ale la mele lavia i vano i unu na patu ima mata vuro.

¹¹Hin vutepongi atu Moli mo turu mariviti isan Paul ale mo vereea mara, “O sopo matahu! Matan sohena nakerihi ko lo vereuliau nike Jerusalem, o pa vereuliau sohena Rome.”

La Hatihia Vara La Pa Vilimatei Paul

¹²Mo mele rani sahe, vao Jew matea la mai jara matea, la lihora na retitauhi matea vara la pa sopo tikeli te hanhani teni te wai vavano, la

vilimatei Paul. ¹³Vao atu sei la vai retitauhi atu mo jeu mo ngavulu vati (40).

¹⁴La vano isana p̄ris aulu peresi na vajiahara, ale lara, “Kama liho kamam na retitauhi matea vara kama pa sopo mele tikeli te hanhani teni te wai vavano kama vilimatei Paul. ¹⁵Ale nakerihi kamim peresi na tamlohi council ha vahaŕule matana isan patu tamlohi vuro aulu atu, vara i lavia i sinai isamim. Ale ha vaia sohena vara ha pa mele kilau usuri mamahuni na nona aria. Ale kama pa tatamahu vara kama vilia na malele, ale i pa sopo eŕi kakau nike.”

¹⁶Pani natun vetasin Paul mara mo rongoa vara la pa luhu hinia, mo mai mo unu hin patu ima mata vuro atu mo vereulia isan Paul ¹⁷Ale Paul mo tovi na captain matea hin la captian atu mara, “O lavi uluvou nike i sahe isan nom commander, ale uluvou nike i pa vere na hinau matea isana.”

¹⁸Ale captain atu, mo lavia mo sahe isan nona commander ale mara, “Paul mo toviau mo usiau vara a lavi uluvou nike i mai isam, matan enia mo lavi na retisohai matea vara i pa silea isam.”

¹⁹Pa commander atu mo tauri na limana, ale mo lavia la sivo enira hasera, ale mo usia mara, “Sava natu ko opoia vara o vereia isaku?”

²⁰Mo ŕaramia mara, “Jew la majinga moiso vara pavuho, la pa usiho vara o lavi Paul i sivo na council, vara la pa mele kilau usuri mamahuni na nona aria. ²¹Pani o sopo tinaŕihia vara la haluhaluho matana! Matan tamlohi mo jeu mo ngavulu vati (40) la pa luhu la lo saovia. La lihora na retitauhi matea moiso vara la pa sopo tikeli te hanhani teni te wai vavano la vilimateia. Ale nakerihi la tatamahu moiso, la lo saovi na nom majinga purongo natu.”

²²Moiso, commander atu mo ŕule uluvou atu mo mele malue, ale mo vereia isana mara, “O sopo mele vere tea hin hinau akerihi ko vereia isaku.”

La Lavi Paul Mo Sivo Caesarea

²³Moiso, pa commander atu mo tovi na nona captain mo rua, ale mo vereia isara mara, “Ha tatamahuni te tamlohi vuro i ngavulu sangavulu rua (200) vara la sivo Caesarea nohorihi na matan alo i limaravati na vutepongi, peresi te hos i ngavulu limaravrua (70) peresi na tamlohira, ale peresi te tamlohi vuro mata sari i ngavulu sangavulu rua (200). ²⁴Ha tatamahuni te hos non Paul vara i pa vele hinia, ale ha lavi mamahunia i sivo isan Felix tamlohi aulu matan Palestine.”

²⁵Moiso mo uli leta nike isan Felix mara,

²⁶“Leta nike enau Claudius Lysias na lo uli na noku retiolooolo mo vano isam Felix tamlohi aulu ŕuhuŕuhu. ²⁷Tamlohi akerihi, Jew hai la taurilatia ale la tatamahu vara la pa vilia ale na sinai peresi na noku

tamlohi vuro ale kama nañihia, ale matan na levosahia vara enia mara Rome matea na lo matahia. ²⁸Na lavia mo sivo na nora council matan na opoia vara a levosahi mamahunia vara la lo aria mata sava. ²⁹Na hiteulia vara la lo tuvaia matan te hinau usuri na leu mata nora rasua, pani mo sopo matan te hinau vara i pa toho na ima řilangi teni i mate matana. ³⁰Pani nara na levosahia vara la lo vai na malele matea vara la pa vilimateia, na řulea mo mai nike isam vahatea. Ale na vereia isan la haratu la lo aria vara la pa lavi na nora retiaria sei la lo aria hinia la vereia isam.”

³¹Ale la tamlohi vuro atu la vaia usuri na nona retileu. La lavi Paul mo sivo Antipatris hin vutepongi atu. ³²Mo mele rani sahe, la tinañihia vara tamlohi vuro na hos purongo la sivo peresia. Ale enira la mele hilu la sahe na nora patu ima mata vuro Jerusalem. ³³La tamlohi vuro na hos atu lara la pala Caesarea, la lavi Paul peresi pa leta atu la silea isan tamlohi aulu atu Felix. ³⁴Tamlohi aulu atu mara mo evi leta atu moiso, mo usi Paul vara mo tai na sava jara, ale mara mo levosahia vara mo tai Cilicia, ³⁵mo vereia mara, “A pa sileho na masapa vara o retireti hin rani atu vara nom meresahi la pala nike.” Moiso, mo retileu vara la pa pelati horo Paul na jara matea na lolo ima tavera, iman Herod Agrippa.

Paul Mo Turu Na Nahon Felix

24 ¹Ale rani mo lima la vano moiso, Ananias pa pñis aulu atu mo sinai peresi na vajiaha hai peresi na tamlohi retireti na leu matea hijana Tertullus, ale matan vara la sile na nora retiaria matan Paul isan tamlohi aulu atu Felix. ²Ale lara la tovi Paul mo sinai moiso, Tertullus mo tapulo aria mara:

“Tamlohi aulu Felix, kama lo toho na tamata mo peravu jea na ruhuruhum, ale hina paro řuhu hai la malue na jaramam usuri na nom kilakilau. ³Kama lo vere la hinau nike na jara tari, ale na malele tari na nomam vere meje. ⁴Pani matan vara a sopo mele taurilatihio i peravu, na lo usia isam vara o tapurongo isamam makomona purongo usuri na nom řomřuhu. ⁵Matan kama tapaia vara tamlohi nike enia tamlohi lejileji matea, enia tamlohi matea mo lo vai na tamlohi la lo matavuhi mata vai na hina sati na jara tari Jew la lo toho ea na varama, ale enia patu tamlohi nona vao haluhalu matea la lo tovia lara vao mara Nazareth. ⁶Mo sopo haratu purongo, pani kama tauria hin rani atu mo lo vaihitea vara i vai na Temple i lumiha. ⁷⁻⁸O pa eñi tapai na retivarařuhu mata nomam aria isana hasena vara o usia.”

Paul Mo Řaramira

⁹Ale, la Jew atu sei la lo tapurongo usuria, la tapulo verelejeleja, ale lara hinau tari sei Tertullus mo lo verera la varařuhu.

¹⁰Pa tamlohi aulu mara mo tahe na limana vara Paul i eñi retireti, Paul mo řaramia mara: “Matan na levosahia vara engko ko lo toho sohena tamlohi aria matea matan jara nike tuai moiso mo mai, mo vaiau na sopo matahu vara a vere na noku retireti. ¹¹Ale vara ko opoia, o pa eñi levosahia vara rani mo sopo lo jeu sangavulu řomana mo rua na sahe Jerusalem mata lotu. ¹²La sopo tapaiiau vara a lo vasvas peresi tea teni vara a lo tovi matavuhi na tamlohi matan vara la vai te hina sasati na lolo rope Temple, teni hin te ima lotu hatea teni na malele matan taon tavera atu Jerusalem. ¹³Ale la tamlohi nike, la sopo eñi pisuhiau hin te hinau hatea hin la hinau nike la lo ariau vara na vaira.

¹⁴Pani na taviti vara na lo lotu God non nomam pua usuri na malele rasua hara sei la lo vere a enia rasua haluhalu matea. Ale na lo rasu na hinau tari sei Moses peresi na přovet la ulia na Leu. ¹⁵Enau na lo tau na noku řomtoho isan God sohen la tamlohi nike vara i pa sauteterahi na tamlohi tari, la haratu la tataholo peresi la haratu la sopo tataholo. ¹⁶Matan hinau atu natu, mo lo vaiau na lo vaihitea tarea vara řomiku i pa sopo kaka hin te hinau isan God teni isana tamlohi.

¹⁷Tauni mo visa la vano moiso na sopo mele toho Jerusalem, ale na mele sinai ea peresi na otori nona noku tamlohi vara a silea isan la haratu la tilavono, ale vara a sile na noku silesilea mata malamalai, ¹⁸sei na lo vaira hin rani atu la tapaiiau na lolo rope Temple. Na pete vokevoke moiso usuri na nomam posposi, ale mo sopo te vao teni tea i lo vai na valum. ¹⁹Pani Jew hai matan Asia, i pa řuhu jea vara la lo toho akerihi na nahom nakerihi matan vara la tuvaiau hin te retiaria matan te hinau sati vara la eñi vere a matakau. ²⁰O to usi la tamlohi nike vara sava hina sati natu, la hitea hiniau hin rani atu na lo turu na nahon council atu, ²¹pani hinau matea purongo na ulu na vere a na nahora nara, na lo turu nike na aria nahapani matan na rasu na sauteterahi nona mateia.”

²²Moiso Felix, matan enia mo levosahi mamahuni na malele nora rasua mo řuhu, mo vere a mara nora masapa mata sile na nora retireti mo isoiso, ale mo vere a isara mara, “Sava rani vara patu tamlohi vuro aulu atu Lysias i sinai nike, a pa sile na noku řomřomi mata nomim aria.” ²³Ale mo retileu vara captain atu, i lo kilau mamahuni Paul na ima tavera atu purongo. Ale vara i sopo horoa na masalona, ale vara i sopo horo na tapalan Paul vara la opoia vara la mai la tuenia.

Felix Mo Tapurongo Isan Paul

²⁴Rani mo visa la vano moiso, Felix enia narouna Drusilla sei enia Jew matea, la pala. Ale mo vahařule matan Paul vara la tapurongo hinia vara i verera hin rasua atu hin Iesu Křisto. ²⁵Ale Felix mara mo rongu Paul mo lo sorahi na mauri tataholo, ale mata hase taurilatihu peresi na rani ari tavera sei mo lo mai, enia mo matahu tavera, ale mara, “O vano tako, ale

vara te masapaku a pa mele vahañule matam.”²⁶ Mo lo tapurongo hinia, pani mo lo řomtau vara Paul i pa silea hin te mania na hañi tamlohi, ale matan haratu, mo vahañule matana vaha visa vara i mai i sorasora peresia.

²⁷Tauni mo rua la vano sohen haratu moiso, natu Porcius Festus mo pete lavi na jaran Felix, pani matan Felix mo opoia vara i vai na Jew la avulahi, mo tau Paul na ima řilangi.

Paul Mo Turu Na Nahon Festus

25 ¹Festus mo pala Caesarea ale rani mo tolu tinapua la vano moiso, ale mo sahe Jerusalem. ²Ale moli nona pñis peresi na tamlohi aulu nona Jew la lavi na nora retiaria hin Paul la vano isana. ³La usia isana vara i vai na sava la opoia matan Paul, la usi Festus mo řilangi vara i vahañule vara i mai Jerusalem matan la hatihia moiso vara la pa luhu na malele vara la vilimateia. ⁴Moiso Festus mo řaramira mara la lo taurilatia Caesarea, ale enia i pa mele sivo atu i sopo tuai. ⁵Mo veree mara, “Ale, mo řuhu vara nomim tamlohi tatavera la sivo atu peresiau, ale vara tamlohi akerihi mo vai te hinau mo sati, la pa eñi sile na nora retiaria.”

⁶Ale Festus mo mele toho Jerusalem mariviti rani i sangavulu, moiso mo pa sivo Caesarea. Ale mo mele rani sahe mo sakele na jara sakele mata aria, ale mo retileu vara la lavi Paul i mai isana. ⁷Paul mara mo pala, la Jew atu sei la lo tai Jerusalem la lo sinai, la turu řalihia la lo tuvaia na hinau sasati hai sei la sopo eñi vujangira vara la varañuhu. ⁸Paul mo sile na nona retireti mata horora mara, “Na sopo vai te hinau i sati mata i vaiua a meresahi na leu nona Jew, teni na Temple, teni isana supe matan Rome.”

⁹Pani Festus mo opoia vara i vai na Jew la avulahi, mo usia mara, “O pa avulahi vara o sahe Jerusalem vara o turu na aria na nahoku matan la hinau nike?”

¹⁰Paul mo řaramia mara, “Nakerihi na lo turu na jara tataholo moiso mata aria na naho jara sakele mata ari non supe matan Rome. Na sopo vai te hinau i sati isana Jew sohen engko ko levosahi mamahunia. ¹¹Vara na vai te hinau mo tataholo vara a mate matana, na sopo řohu na mate. Pani vara na lo vokevoke purongo, engko teni te hatea i sopo eñi tauau na liman la tamlohi nike sei la opoia vara la vilimateiau. Na opoia vara a turu na nahon supe matan Rome!”

¹²Festus mo sorasora peresi na nona tamlohi tuetueni sei vara la sile te řomřomi hatea isana, moiso mo řaramia mara, “Ko opoia vara o turu na nahon supe matan Rome, ale isan supe matan Rome o pa vano.”

Festus Mo Sorahi Paul Peresi Harua Supe Agrippa

¹³Rani mo visa la vano moiso, harua supe Agrippa mo pala Caesarea peresi vetasina Bernice, matan vara la sile na nora oloolo isan Festus.

¹⁴Hin la rani atu la lo toho peresia, Festus mo vereuli na sorasora matan Paul isan supe atu matan vara i sile te retireti matana mara:

“Felix mo tau na tamlohi matea mo lo toho na ima řilangi. ¹⁵Na rani na lo toho Jerusalem, moli nona pñis peresi na vajiaha nona Jew la vereau hinia, la usiau vara a sile na talai isana. ¹⁶Na vereea isara nara, mo sopo usuri na posposi nona mara Rome vara a sile te tamlohi na talai vara mo sopo lo lavi te masapa vara i turu nahonaho peresira, ale i řarami na retireti non la haratu la lo tuvaia.

¹⁷Ale hitahuna, la mele usuriau la sinai nike, na sopo mele toho i peravu, pani mara mo mele rani sahe na sakele vara a aria. Ale na tovia vara i mai na nahoku. ¹⁸Pani la haratu la lo tuvaia lara la turu, la sopo tuvai Paul hin te hinu sasati sohen na lo řomřomia. ¹⁹Mo vono, la sopo turu jara matea na nora řomřomi matan te hinu mata nora rasua, ale mata tamlohi matea hijana Iesu sei mo mate, hara sei Paul mo lo vereea vara mo mele mauri. ²⁰Matan na sopo levosahia vara a pa vileiuli la hinu nike sohena sava, na usia isana vara mo avulahi vara i sahe Jerusalem ale i pa turu na aria ea. ²¹Pani Paul mo opoia vara i lo toho tako na ima řilangi, i lo saovi na řomřomi non nořa tamlohi tavera supe matan Rome. Matan haratu, na retileu vara la lo kilaua i tikeli rani atu a eři řulea i vano isan supe matan Rome.”

²²Moiso Agrippa mo vereea isan Festus mara, “Enau na opoia vara a tapurongo hin tamlohi atu.”

Mo řaramia mara, “Pavuho o pa tapurongo isana.”

Paul Mo Turu Na Nahon Supe Agrippa

²³Ale mo mele rani sahe, supe Agrippa peresi Bernice la mai na nora pohapoha, ale la unu na jara tavera atu mata matavuhi peresi na nora patu tamlohi aulu mata vuro, peresi na tamlohi aulu matan taon tavera atu. Moiso Festus mara mo retileu, la lavi Paul mo unu. ²⁴Ale Festus mara, “Supe Agrippa peresi kamim mo isoiso sei ka lo toho peresi kamam nakerihi, ka hite tamlohi nike natu sei tamlohi aulu nona Jew tari la lo usiau mo řilangi Jerusalem peresi nike Caesarea, vara a taua na mateia. ²⁵Pani na noku kilakilau na hitea vara mo sopo vai te hinu vara i lavi na mateia matana. Ale mara mo opoia vara i turu na nahon nořa tamlohi tavera, supe matan Rome, na majinga vara a pa řulea i sahe isana. ²⁶Pani na sopo levosahia vara a pa uli na sava isan noku supe matana. Matan haratu, na revea mo sinai na nahomim tari, pani na nahom supe Agrippa, matan vara na isoison retireti akerihi, korong a pa eři lavi te retireti vara a ulia. ²⁷Matan na hitea vara mo sopo tataholo isaku vara a řule te tamlohi hatea sei mo lo toho na ima řilangi vara la sopo vere mamahuni na nora tuvai matana.”

Paul Mo Sile Na Nona Retireti

26 ¹Ale supe Agrippa mo vereea isan Paul mara, “O eři turu natu, o retireti.”

Ale Paul mo turu mo tahe na limana ale mo tapulo retireti mara, ²“Enau na avulahi jea supe Agrippa matan engko natu o pa tapurongo na noku retireti matan la hinau nike tamlohi tatavera nona Jew la lo tuvaiau hinira. ³Matan na levosahia vara engko ko levosahi mamahuni na posposi nona Jew peresi na retiusia sei tamlohi la lo sorahira tarea. Ale matan haratu, na lo usia isam vara o ñomperavu mata tapurongo isaku.

⁴Jew tari la levosahi mamahuni na mauriku, mo tapulo na lo uluvou peresi na tahisaku tataholo ale na rani na lo toho Jerusalem. ⁵Vara la majinga la eñi vereva vara enau Pharisee matea, vao matea sei la ñilangi jea mata noña rasua. ⁶Ale nakerihi na lo turu na aria, na lo ñomtoho matan retitauhi atu God mo vaia isana noña pua vara i masese. ⁷Supe Agrippa, noku tamlohi tavera, retitauhi atu natu mo vai la tavitavui tupu sangavulu ñomana mo rua atu la lo volitusi isan God tarea matana. Matan ñomtoho atu natu, la Jew nike la lo tuvaiau matana. ⁸Mata sava natu, mo ñilangi vara tea i rasua vara God mo lo sauteterahi na tamlohi mate?

⁹Varañuhu, tiroma enau haseku na levosahi mamahunia vara mo tataholo vara a komo na tamlohi usuri non Iesu mara Nazareth. ¹⁰Ale hinau atu natu, na vaia Jerusalem. Na sopo tau na tapuhi na ima ñilangi na suiha na lavia isana moli nona pñis purongo, pani na majinga vara la pa vilimateira. ¹¹Vaha visa na rupira na asi maja matea na ima lotu nona Jew, ale na vaihitea vara la retisati hin Kñisto. Matan na lo lolokoru sasati hinira, na vano vara a tipahira na taon tavera na jara tinapua sohena.

¹²Na lo vai hinau atu natu hin rani atu na lo sahe Damascus, moli nona pñis la sileau na suiha vara a eñi vaia, ¹³moiso na pa lo toho na maleleku korong alo mo posi noku tamlohi tavera, na hite na memera tavera matea mo tai na tuka, mo mera mo jeu na alo, mo sasari ñalihiau peresi la haratu la lo hahau peresiau. ¹⁴Kamara kama jovi sivo na lepa moiso, na rongo na leo matea mo retireti isaku na leomam tavitavuim Israel mara, ‘Saul, Saul, mata sava ko lo tipahia? Ko lo hasem hotiho!’

¹⁵Ale nara, ‘Engko hare tamlohi tavera?’

Ale Moli mo vereva isaku mara, ‘Enau sei Iesu haratu ko lo tipahiau. ¹⁶Pani o turu! Matan na pala isam vara a viñoniho vara engko volitusi matea. Ale o pa vereuli na hinau ko hitera ale hin te hinau a pa mele vujangira isam. ¹⁷A pa juriho isana tavitavuim peresi la tamlohi ñoñoha sei na lo ñuleho vano isara, ¹⁸matan vara o pa roi na matara vara la pa vahañi na ñoñoha la mai na malarani, ale vara la malue na suihan Setan la mai isan God matan vara i eñi ñomi na nora hehe, ale la pa lavi na ñungara peresi la haratu sei God mo tapuhira mata nora rasua hiniau.’

¹⁹Matan haratu supe Agrippa, enau na oloolo hin hinau atu Moli na tuka mo vujangia isaku, ²⁰ale matana, na vereulia isana mara Damascus tiroma, moiso isan la haratu la lo toho Jerusalem ale na jara tari Judea,

ale isana tamlohi řořoha matan vara la pa vahaři na nora hehe la mai isan God, ale la vujangia vara varařuhu la posi moiso na nora vavahinau řuhu la lo vaira. ²¹Matan hinau atu natu, Jew la tauriau na lolo rope Temple, ale la lo vaihitea vara la vilimateiau. ²²Pani, na lo lavi na tuetueni isan God tarea mo tikeli nahapani, ale na lo turu na lo vereulia isan la haratu la tamlohi purongo, peresi la haratu la aulu, na sopo vere te hinau tinapua, pani haratu purongo sei přovet peresi Moses la lo vereia vara i pa masese; ²³vara Křisto i pa lavi na nona rani řilangi, ale i pa tiroma hin la haratu la turu na mateia sohena malarani matea isana Jew peresi na tamlohi řořoha.”

²⁴Vahatea purongo, Festus mo ulo mara, “Paul, nom lelevosahi tavera mo vaiho ko putu!”

²⁵Pani Paul mo řaramia mara, “Noku tamlohi tavera Festus, na sopo putu, pani na lo vere na varařuhu na hinau na levosahi mamahunira.

²⁶Matan supe Agrippa mo levosahi la hinau nike, ale na lo vere la hinau nike isana matan a sopo eři rasua vara enia mo sopo levosahi la hinau nike, matan la hinau nike la sopo masese hin te tavalu jara rihirihitea. ²⁷Supe Agrippa, engko ko rasu na přovet teni mo vono? Na levosahia vara ko rasura.”

²⁸Agrippa mo vereia isan Paul mara, “Ko řom vara o eři vaiau na mai kalesia matea vila sohen harihi?”

²⁹Paul mo řaramia mara, “Vara i vila teni mo vono, pani na lo usiusi isan God vara engko peresi la tamlohi sei ka lo tapurongo isaku nakerihi, vara ha pa mai soheku — pani i sopo peresi na jen.”

³⁰Moiso, pa supe atu mo turu ale Festus, Bernice peresi la haratu la lo sakele peresira la usuria, ³¹ale lara la lo malue, la lo vereverea isara lara, “Tamlohi nike mo sopo vai te hinau vara i tataholo mata i mate matana, teni vara i vano na ima řilangi matana.”

³²Agrippa mo vereia isan Festus mara, “Tamlohi akerihi i eři malue purongo vara i sopo lo usia vara i turu na nahon supe matan Rome.”

Paul Mo Malue Vara I Sahe Rome

27 ¹Lara la hatihia vara kama pa malue matan vara kama sahe Italy, la tau Paul peresi na tatua tamlohi tinapua na ima řilangi na lima captain mata tamlohi vuro matea hijana Julius. Enia mo lo kilau na vao tamlohi vuro matea, ale vao tamlohi vuro atu la lavi na hijan nora supe matea matan Rome tuai sei Augustus. ²Kama vele na boti matea mo malue Adramyttium sei mo tatamahu vara i pa maro usuri na vusalean Asia, ale kama malue. Aristarchus mara Macedonia matea mo tai Thessalonica mo usuri kamam.

³Mo mele rani sahe kama hoso Sidon, ale Julius mo kilau mamahuni Paul na posposi řuhu, ale mo tinařihia vara i eři sahe i hite na tapalana

matan vara la eīi tuenia na nona vejuveju. ⁴Kama mele malue atu kama sivo na tasi, ale kama maro na maumau ureuren Cyprus matan kama lo songai na langin hapuara hañua. ⁵Kama maro roto na tasi tavera moiso, kama sahe usuri vusalean Cilicia ale Pamphylia. Ale kama hosu Myra hin Lycia. ⁶Hin jara atu captain mata tamlohi vuro atu mo tapai na boti tinapua matea matan Alexandria mo lo sahe Italy, ale mo tau kamam hinia.

⁷Kama maro malum na tasi mata rani matuvana, mo řilangi pani kama mai mariviti Cnidus, pani langin hapuara hañua atu mo horo kamam, kama pa sopo eīi mele vano. Ale kama posi sivo kama maro usuri na maumau ureuren Crete kama jenu na jingon Salmone. ⁸Kama maro usuri na vusaleana, kama lavi na rani řilangi. Ale kama mai na jara matea la tovia Fair Havens, enia mo lo toho mariviti na taon matan Lasea.

Kama Ori Na Langi Tavera

⁹Matan rani řuhu mo visa la vano purongo moiso, nomam hahau nakerihi mo pa mele sati jea matan taro hamariri tavera peresi na langi sati matan October mo pala moiso, ale rani mata tapuhoro na hanhani nona Jew mo isoiso tuai moiso. Ale Paul mo vereia isara mara,

¹⁰“La tamlohi tavera, na hitevosahia vara noña hahau i pa isoiso na rani sati vara řa malue akerihi nakerihi. Ale mo sopo hinahinau na lolo boti purongo la pa tihai, pani mauriřa sohena.” ¹¹Pani pa captain atu, mo tapurongo na retireti non captain nona boti atu peresi na tamlohin boti atu, ale mo sopo tapurongo na sava Paul mo lo vereia. ¹²Matan jara atu enia mo sopo řuhu vara tea i eīi toho atu na taro hamariri teni na taro langi, vaora la hatihia vara la malue atu. La lo řomtaua vara la eīi tikeli Phoenix, mo naho sivo Malahañua enia jara matea matan Crete ale jara řuhu mata luhu na langi, ale la pa toho atu na taro hamariri.

Langi Tavera Mo Vilira Na Tasi

¹³Langin tahuna matea mara mo tapulo ivi malum, la lo řomřomia vara la pa eīi tikeli Phoenix. Ale kama reve nařihi na matalalavo, kama hapahapani usuri na vusalean Crete. ¹⁴Pani mo sopo tuai, langi sati tavera matan Tokalau mo jovi mo malue hin ureure atu mo vili kamam. ¹⁵Boti atu mara mo kali hinia, i sopo eīi mele songaia, kama tavuti kama tinařihia mo sere kamam.

¹⁶Kama sivo kama tikeli na maumau ureuren Cauda. Mo řilangi pani kama taurilati boti rihirihia atu sei boti tavera atu mo lo revea. ¹⁷Tamlohi voko mata boti lara la sau nařihia moiso, la talihi na tali na pangen boti tavera atu ale la liholatia. Ale matan la matahu vara langi i pa pulahi kamam kama hosu na rataratan Syrtis, la tuhu na timlen boti atu matan vara i taurilatira, ale la pa sivo malum purongo.

¹⁸Mo mele rani sahe, matan langi atu mo tapulo řari boti atu, tamlohi voko la tapulo pulahi na lavilavi sivo na lolo tasi. ¹⁹Mara mo mele rani sahe la tapulo pulahi na hinahinaun boti atu peresi te hinau sei la hitera la lo toho toho purongo. ²⁰Ale matan kama sopo mele hite na alo teni te vitusarasara mata rani matuvana moiso, ale langi atu mo sopo moti, kama sopo mele řomtoho vara kama pa juri hinia.

²¹Matan vao tavera la řohu na hanhani, Paul mo turu sahe na livuhara, ale mara:

“La tamlohi, vara ha pa lo tapurongo isaku, vara řa sopo lo malue Crete, řa pa sopo eři lavi na rani řilangi sohen harihi, teni vara řa pulahi tihai te hinau na tasi. ²²Pani nakerihi, na lo vere kamim hinia vara ha sopo matahu, matan tea i pa sopo eři mate, pani boti akerihi purongo i pa tihai. ²³Matan na vutepongi na hite na angelo matea non God sei enau nona volitusi, mo turu na pahisaku ²⁴ale mo vere isaku mara, ‘Paul, o sopo matahu! O pa turu na nahon supe matan Rome, ale God mo tinařihia vara tamlohi tari sei la lo toho peresiho la pa mauri.’

²⁵Matan haratu, ha řomřilangi la tamlohi, matan enau na tau na noku rasua hin God vara i pa sohen haratu mo vere isaku. ²⁶Pani na levosahia vara boti akerihi i pa takosa hin te ureure hatea.”

Boti Mo Mai Mariviti Na Jarauta

²⁷Na sangavulu řomana mo vati vutepongi matan langi atu, langi atu mara mo lo pulahi kamam, kama lo sivo roto na tasin Adria. Tamlohi voko hin boti atu la levosahia vara kama lo mai mariviti na jarauta.

²⁸Matana, la tuhu na asihai ale la hiteulia vara puahana mo tikeli na metre mo ngavulu vati (40). Ale la mele sahe makomona la mele tuhu pa asihai atu, ale la mele hiteulia vara nakerihi natu puahana mo tikeli na metre mo ngavulu tolu moiso (30).

²⁹Ale matan la matahu vara kama pa kali hin te paranga, la tuhu na matalalavo mo vati na pulo boti, ale la opoia vara i rani vila. ³⁰Moiso tamlohi voko la vaihitea vara la rovo hin boti atu, la tuhu pa boti rihirihia atu, ale lara la lo vaia, o hitea sohena vara la pa tuhu na matalalavo na patun boti tavera atu. ³¹Pani Paul mo vere isan nora captain mata tamlohi vuro atu peresi la tamlohi vuro atu mara, “Vara la tamlohi akerihi la malue hin boti akerihi, ha pa sopo eři juri!” ³²Moiso la tamlohi vuro atu la tai roto na asin pa boti rihirihia atu, la tinařihia mo sale.

³³Mo pa lo nahonaho rani, Paul mo vere řilangi isara vara la hani te hinau mara, “Nahapani enia harau wik natu sei ka sopo hani te hinau matan ka sopo levosahia vara ha pa mauri teni mo vono. ³⁴Matan haratu, na lo vere řilangi vara ha hani te hinau matan enia i pa tueni kamim vara ha pa sopo mate. Matan te vulun te vonamim hatea i pa sopo eři tihai na patuna.” ³⁵Mara mo vere hinau atu mo isoiso, Paul mo lavi

na pereti ale mo vere meje isan God na nahora mo isoiso matana, mo topea ale mo tapulo hania. ³⁶Matan haratu, enira mo isoiso řomira mo mele řilangi ale la hanhani. ³⁷Evimam hin boti atu mo tikeli ngavulu sangavulu rua mo ngavulu limaravrua mo limarave (276).

³⁸Lara la hanhani la masu, la pulahi na tanga wit mo sivo na lolo tasi matan vara i vai na boti i salesale.

Boti Mo Kali Na Paranga

³⁹Rani mara mo pala, la sopo hitevosahi jara atu, pani la hite na jara luhu matea peresi na oneone, ale la hatihia vara la eři vaia vara boti atu i hoso hinia. ⁴⁰Ale la tai roto na asi mata matalalavo sei la lo toho na lolo tasi, ale la uli nařihi asihai atu sei mo lo tauri la stian boti atu jara matea, moiso la tahe na hapanin patu boti atu mo sahe na langi, la haloa mo sahe na oneone. ⁴¹Pani la tia na jara matea tasi mo lo maro leji hinia, ale patun boti atu mo kali na ratarata mo řilangi i sopo eři mele hisu, pani loloputu la lo tapulo kauti na pulo boti moiso.

⁴²La tamlohi vuro atu la hatihia vara la pa vilimatei la tamlohi atu mata ima řilangi matan vara tea i sopo olo i rovo. ⁴³Pani pa captain mata tamlohi vuro atu matan mo opoia vara i juri na maurin Paul, mo horora vara la sopo vai na sava la hatihia moiso. Mo retileu mara la haratu la eři olo la kue nařihi tiroma ale la olo sahe na jarauta, ⁴⁴ale sopera la pa lo hitahu, tea la pa keho hin te tavalu tapea teni te hinau i eři sale hin boti atu. Hin malele akerihi natu, tamlohi tari hin boti atu la jelu la sahe na jarauta hinia.

La Hoso Na Ureuren Malta

28 ¹Kama hoso na jarauta mo řuhu moiso, kama pa levosahia vara kama lo toho na Ureuren Malta. ²Tamlohin jara atu la řuhuřuhu isamam hajavua, matan mo lo usa ale hamariri tavera. Ale la avulahi vara la lavi kamam, matan la polo na hapu tavera matea matan vara kama pa marijo hinia.

³Paul mara mo rako na oti rangaranga hapu matea, ale mo lo taua na hapu, mata sasati matea mo malue matan hapu atu ale mo katoho na limana. ⁴Tamlohin jara atu lara la hite maji atu mo lo keho na liman Paul, la lo vereverea isara lara, “Mo sopo te retiusia vara tamlohi akerihi enia tamlohi vili tamlohi matea teni mo vono, hina purongo vara mo juri na tasi, pani nořa god hařai sei Justice, mo sopo tinařihi vara i mauri.” ⁵Pani Paul mo pulapulahi nařihi maji atu mo sivo na lolo hapu, ale mo sopo rongu i sati. ⁶Pani la tamlohi atu la lo kilau vara epena la pa sosohi teni i pa jovi i mate vahatea. Ale la lo saovi mo peravu moiso ale lara la sopo hite te hinau i vaia, la posi na řomira lara enia god matea.

⁷Ale řalihi hin jara atu lepa enia non patu tamlohi matan Malta, hijana Publius; ale enia mo avulahi hin kamam, mo lavi kamam mo lo kilau

mamahuni kamam mata rani mo tolu. ⁸Taman Publius mo rojo mo lo juruvi na vatana. Mo lo rongohaji na seserei peresi na jimajima. Paul mo unu mo sivo mo hitea, ale mo ususi isana, moiso mo tau na limana hinia ale mo vai na nona rojoa la tihai. ⁹Hinau atu mara mo masese mo isoiso, tamlohi matuvana hin ureure atu sei la rojo, enira sohena la mai isan Paul ale la mele řuhu. ¹⁰Matan haratu, la sile kamam na hinau matuvana, ale kama lo tatamahu vara kama pa mele malue, la sile na hinau tari kama pa vejuveju hinira na boti.

Paul Mo Kakau Rome

¹¹Vitu mo tolu la vano moiso, kama pa mele malue sivo na tasi na boti tinapua matea matan Alexandria sei mo lo luhu hin ureure atu. Ale na patuna la tai na patu god mo rua sei la tovira ‘Havo Matan Tuka’. ¹²Kama maro kama hosu Syracuse na ureuren Sicily, ale kama lo toho atu mata rani mo tolu. ¹³Kama malue atu kama hapahapani kama vano na jara tinatinapua, ale kama sahe kama hosu Rhegium, ale mo mele rani sahe, langin tahuna mo sere, ale na harua rani kama hosu Puteoli. ¹⁴Hin jara atu kama hite na vorai kalesia hai, ale la usi kamam vara kama pa toho peresira, ale kama lo toho atu mata rani mo limaravrua. Kama usuri na malele atu kama hahau kama sahe kama pala Rome.

¹⁵Vorai kalesia řalihi hin jara atu lara la rongoa vara kama lo sahe Rome, la tai Rome la sinai vara la hite kamam. La jara atu la hahau matara la asau řove sohen na taon sei Forum matan Appius peresi Ima Mo Tolu atu mata tamlohi hahau. Paul mara mo hitera, mo vere meje isan God ale mo mele řilařilangi.

¹⁶Kamara kama unu Rome, la tinařihia vara Paul i eři toho enia hasena peresi na tamlohi vuro matea mo lo kilaua.

Paul Mo Retivujavujangi Isana Jew Rome

¹⁷Rani mo tolu la vano moiso, Paul mo tovi na tamlohi tavera nona Jew hin jara atu la mai jara matea. Lara la sakele matavuhi moiso, mo vereea isara mara:

“La vorai, hina purongo vara na sopo vai te hinau i sati isana nořa tamlohi teni na posposi nona nořa pua, la taurilatiau Jerusalem ale la tauau sohena tamlohi sasati matea na lima mara Rome. ¹⁸Tamlohi tavera atu lara la kilau usuri na sava la tuvaiau hinira, la opoia vara la tinařihiau matan la sopo lavuti te hinau vara a pa mate matana. ¹⁹Pani Jew lara la sopo avulahi hinia, mo vaiu na mele usia vara a pa turu na nahon supe matan Rome, mo sopo matan vara a pa tuvai na tahisaku hin te retireti. ²⁰Matan hinau atu natu, mo vaiu na opoia vara a hite kamim ale a retireti isamim. Matan enau na lo toho hin jen nike matan na lo tau na noku rasua hin řomtoho atu nona tadvavuin Israel matan Tamlohi Jujuri.”

²¹ La řaramia lara, “Kama sopo lo lavi te leta Judea matam, teni te vorai atu mo sopo lo sinai nike vara i vere te hina sasati matam. ²² Pani kama opoia vara kama rongo na řomim hin rasua nike sei tamlohi na jara tari la lo verelejleja.”

²³ La tau na rani matea vara la pa matavuhi peresia. Ale la mai na jara mo lo toho ea, enira vao tavera, mo tapulo na ralavuhō mo tikeli na ravravi mo lo vere mamahunia, ale mo vereuli mauri atu God mo aulu hinia, ale mo vaihitea vara la tau na nora rasua hin Iesu hin na leu non Moses peresi na přoвет. ²⁴ Tatuara la rasu na sava mo lo vereā, pani hai la řohu vara la rasua. ²⁵ Ale la tapulo malmalue, matan řomira mo sopo matea. Hitahuna, Paul mo sile na isoiso reti isara mara, “Tanume Tapu mo vereā mo tataholo mata nomim pua na sava sei přoвет Isaiah mo vereā mara:

²⁶ ‘O vano isan la tamlohi nike,
ale o vereā vara,
Ha pa rongoa vavano,
pani ha sopo eři rongovosahia,
ale ha pa lo kilaua vavano,
pani ha sopo eři hitevosahia.

²⁷ Matan mapun la tamlohi nike
la mate,
ale perora la sopo rongō,
ale la pelati na matara moiso,
matan vara la pa sopo kilau,
ale perora la pa sopo rongō,
ale mapura la pa sopo rongovosahi,
vara i vono la pa posi
ale a pa vai mamahunira.’

Isa 6.9-10

²⁸ Matan haratu, ha lo levosahi mamahunia vara vavahinau sei God mo vaia mata juri na tamlohi, enia mo sohaia mo vano isana tamlohi řořoha: ale enira la tapurongo hinia!”

²⁹⁻³⁰ Paul mo lo toho atu mata tauni mo rua na ima matea mo pakaia, ale mo avulahi na tamlohi tari sei la lo mai isana. ³¹ Mo lo retivujavujangi mauri atu God mo aulu hinia, ale mo lo vujangi hin Moli Iesu Křisto mo sopo te matahu hinia, ale mo sopo tea i horoa.